

摘藻堂四庫全書薈要

集部

欽定四庫全書薈要

集部

文憲集卷二十九至三十



詳校官候補通政司經歷臣郭祚熾

欽定四庫全書舊要卷一萬六千六百八

集部

文憲集卷二十九

明 宋濂 撰

辭 凡三十八章

思媿人辭

有序

序

呂成公實接中原文獻之傳公歿始餘百年而其學殆絕濂竊病之然公之所學弗畔於孔子之道者也欲學孔子當必自公始此生乎公之鄉者所宜深省也嗟夫公骨雖朽公所著之書猶存古之君子有曠百世

而相感者況與公相去又如此之甚近乎聞而知之蓋
必有其人矣托物引類作思媿人辭辭曰

惟媿人之惜媿兮賦嫫質於自然修蛾規而凝黛兮旁
目轉以成睵妥鬢髮而如雲兮靨輔巧以承權纖腰秀
頸若鮮卑兮容都曼而體便娟寶璐縈而右繞兮桂徽
墮以半偏懸明月以綴佩兮錯木難而傳冠向瑤臺而
微步兮意憺靜以貞閒宓妃之倫折芳馨以相遺兮復
溶與乎江干勢翩翩其褰舉兮若游龍之在淵胡人間

不可以久留兮遂凌步乎高寒馮道紀以為御兮鍊天
和而為殮徑駢馭於陽陰兮時上下乎星辰歎予生之
何晚兮不一覲於芳儀念嫫嫫之鮮雙兮邈迴飈而曾
思歔愁悴而委情兮氣滄漚以如炊道苟可以遙之兮
視萬里猶門墀登嶇嶇而騁望兮正晨旭之蒼涼氣噎
豁而閭闔兮莽山川之縱橫樹輪盤糾而柴扉兮蘋艸
藿靡以相望豐狐思羣而永噪兮交鷁慕類以徐翔企
精爽之不徠兮空雲龍之將將寒侘傺而望絕兮耀靈

習其西藏降崇丘而臨曠野兮循故轍以東歸向闌楯
而徙倚兮境外嬰而愁內滋新蟾皎以出天兮想纖美
之曲眉繁星爛而成文兮懷繡帔之陸離蒼瀨霏落而
無滓兮思玉體之弗緇拂蘭袖而起步兮復經緯乎穴
庭苦鴻鴈之靡靡兮獸羽蟲之薨薨撼戶懷以悲惻兮
惕厭容而弗自勝轉曲牖而入堂壇兮牀獨坐對乎華
鐙鐙影搖曳如鳥羶兮象中心之靡寧寒尤狺狺而競
吠兮耳恍聞於楚音疾倒屣以啟關兮飈鬬薄於嵒岑

縹綿綿而莫抒兮托幽寄於瑤琴琴聲咽而思深兮類
孤鶴之鳴陰更家嘆以將闌兮斗杓旋而向東舒枕衾
而就榻兮期夢寐以潛通精氣注以弗釋兮橋有物而
衡中息纏纏以方微兮魂翕翕而上征造旬始而謁太
儀兮羣靈續其若鼓氛旄溶以隨焱兮鳳旂沛而嬰空
馭象車而秉虬節兮鞭列缺以斥豐隆豹舄熊幡聿皇
以奮兮膠流紆譎鬱以相蒙左撝右衛動以綢張兮倏
伸倩泚雲滃而雷春回穴幡纏泊以舛歛兮吸噀瀟率

藹以蒙鴻穆眇眇以前邁兮翩紛紛而弗止莽冥冥以
無垠兮勢皇皇而披靡超氛埃而淑郵兮竟按轡乎朱
陵長麗舉噉以向日兮有赫赭之華文揚芒熒以上焱
兮祭重離之丹門炫赤玉之寶章兮列八龍之威神歛
東趨於蒼極兮青琰紛其並迎羣神衍衍以方饗兮奏
靈和之鳳笙四酎芬而凍飲兮暈玉色而帶蘋耳素威
以升皓宮兮盼四極之浮浮蓐收顧余而破顏兮錫鏤
瓊之華鉤謂貞白以自守兮合左契於伊周折寒門而

燭玄冥兮朔颼颼以吹裘有夫玄巾而擐甲兮握靈它
以為驅重陰沍而未啓兮肅玄氛之幽幽四方非不可
居兮悵所思之莫余都馳兩轂如飛九兮又滔滔而遐
逝靈氛告余以吉故兮子何為兮獨悲若彼中天之有
居兮隔人世之風雨吾將導子之一至今庶弗愆於恒
素怡忽荒以從之兮駕剛飈以徑度宵光炎之炘炘兮
緜纏鬱決而不可正視瑯璁彤楹屹以上起兮瀏濫弘
惝雲譎而波詭連卷欂佹杳以軋芴兮歲魁幼眇蠱以

高峙中洞房之沕穆兮乃媿人之攸居使晏姬為予通
訊兮儼再拜乎堂垂習朱扉之洞開兮移玉趾之委蛇
珠明玉潔不足以為喻兮光照耀乎東西吐芳辭以若
蘭兮意勤勤而告余曰皇降靈兮昭質弗沫染爾穢
兮昧厥施紉葯襦兮曳菰旆結蕙纓兮張椒幃勺桂漿
兮嚙蓀糜索胡繩兮畦揭車集衆芳以遠蒸兮羌郁郁
而斐斐余俯首而敬聽兮書鞶紳以自規海色動而報
曙兮陶去幽而開寤雖嘉辭之盈耳兮邈若人其何處

遂捫膺以沉思兮顓獨處而繚戾也誠因言以會心兮
將神交於千載也亘天地而無初終兮惟我民之秉彝
道弘敷於上下兮必有人而繫之往者固不可作兮幸
方冊之昭如日叅驗於厥躬兮若面命而耳提跼蹐之
嫋嫋兮固難齊於六驥能孳孳而弗怠兮亦千里之可
至余雖質駸而力單兮敢不沾沾而奮厲帶鉤矩而佩
衡兮撤節蒙而祛爵期有形以必踐兮始俯仰而無媿
縱不得媿人以與之游兮又何異同功而並世

予既為此辭嘗

錄一通寄王子克子克盖有志同予學呂
者書以識之庸俟異日各考其學之成也

青山辭

青山崔崔白雲溶溶我疑其中仙人所宮風馬雲輿霓
旌羽幢游行太空翩然相從望而不見使我心冲我本
金華牧羊之童口誦葉笈有聲如鍾震撼岩壑無礙不
通謫居下土黃塵濛濛五色之文布滿西東秋高露清
陟彼危峰呼吸元氣精神內融嘯傲萬物後天而終

雲中辭

有序

黃巖有奇士曰許君弼其字廷輔治周易熒然以文名
會天下紛擾輒被鐵衣操蛇矛集兵以禦寇尤能挽強
命中衆初弗信君設正鵠一百八十步外挾弓矢以往
轟然一發輒中之乃皆歎服由是多驅馳戎馬間及天
兵取台州四方次第平大興文治建科目以取士君慨
然曰聖天子在上可以出而仕矣起應書鄉闈遂取浙
江第二名君文解去通判沔陽府剗煩劇如庖丁解牛
恢恢乎投刃而有餘地已而復慨然曰予家之東有委

羽山其高摩天委羽之下又有桃山焉羣峯相與回環
日未出常有雲氣起其間縹緲輕盈如瓊羅綿籠罩岵
谷如翔如舞絕可愛玩有時下覆欄宇覺此身飄然在
雲之中恍欲逐黃鶴仙人吹簫而往來也第以君恩未
報不敢決去他時髮種種當掛冠而歸與雲為朋姑以
雲中生自號蓋以表其志云夫雲之為物出乎太虛歟
然而有忽然而無其變幻有不可測者當長空晴妍紆
徐其興結而為祥鸞散而為綺霞其文采郁如也及其

黠黠鬱勃錢馬長驅雷電為之恍惚而甘霖注焉嗚呼
雲哉何其有類於君也然非雲之類君實君有取於雲
也樂繁華者贈芍藥以相娛務高潔者貯秋菊以為糧
物何嘗有心而人自強同之爾予方與君談雲中之趣
君忽昂然而來顧予言曰弼知誦子之文久矣盍為賦
雲中辭乎予聞君襟韻洒落得喪一歸於天故其顏四
時無憂色其號為雲中也亦官為之辭曰

委羽之山兮雲薄之勢輪囷兮復嶮嵯膚寸而合兮既

合而復離不崇朝兮雨渺渺渺渺兮雲之歸玄功泯泯
兮邈難知嗟爾雲中之人兮胡不爾思或出兮或處兮
恒與雲以相期

協晨中寥辭

有序

鬼谷仙人畫列禦寇御風圖以獻其師四十二代天師
真人真人號冲虛子而唐封禦寇之號實曰冲虛此其
圖之所以作歟瀟竊觀之髯松奮張有風泠泠然起於
其中霞光發舒閃鑠無定禦寇方乘飈間旋龍裳鸞帶

凌亂不可止遙見神仙隱起大瀛海上旭日一點如火
海濤噴薄迎之濺沫而舞珠景物遼窅令人情塵銷寂
直超鴻濛間嗚呼仙人之畫奇絕矣蓋以媿真人非果
在於禦寇也真人或飛肺上謁太清排空馭氣靡所不
之將真人之似禦寇乎抑禦寇之同真人乎是未可知
也濂因造協晨中寥辭一篇真人或咏於淵精之區九
都衆直當有彈八瓊太瑷來和之者庶幾後天而終可
以凋三光者乎至若禦寇寓言旬有五日而後反者微

旨已脩見其書茲可畧云辭曰

帝青洞真陽太懸恒鬱敷凝神歛上征行與灝氣俱飛輪
入溟滓九光開翠荇腰佩白琥囊吻薦紫琳腴曲龍有文
人持節下明都授以八辰秘攝御萬象初陟彼方文臺大
招許瓊暉廓落黃演炁陽堂明梵樞開明戊巳功玄契曲
晨機羲娥俯倒影流光駐熙夷靈闕動千載視之若斯須
稽首方諸君同餐燕胎芝請授長生錄萬劫以為期闕
予老矣諸書皆失此卷雖久留齋中不克題今日退

朝稍早逍遙禁林涼颼飄飄然吹衣神情爽朗若憑
虛而行歌天上遂濡毫賦此他日煉丹仙華山九轉
成功當與冲虛神游八極握手一笑何翅三千年也

碧嵯亭辭

并序

濂與太常卿魏觀先生游甚久知其為孝敬之人也先
生間嘗來謂濂曰予家鄂之蒲圻蒲圻有山曰蒲首焉
巉然而起如雲旂翠蕤蕩摩空濛間對峙雙石楹直上
如笋中敞碧崖千尋嘉卉靈草雜被之紛紅駭綠儼如

圖畫中我先人愛玩而不忘日支筇步其下或濯纓澗底或味詩坐盤石上或望雲出沒崖谷悠然而忘返遂因以碧崖自號時移事遷層崖絕壁雖蒼然不改於舊而先人則追逐羣仙於風馬雲輿中弗能一見之予每過其下不覺潛然出涕故於宦游所至揭碧崖之名於楣間所以志之志之所以思夫親也雖然名之固寓也而言之則尤寓也曷若親履其地而求先人之遺跡乎當今聖人在上方以孝治天下他日幸遂歸田之請築

亭山麓仍以碧嵯名之當風日清美與二三子游其間
指而言曰彼清泉瀏瀏而斜出者此先人濯纓之處也
磐石累累而可坐者此先人咏詩之地也崖谷沉沉靈
氣之宣通者此先人望雲出沒之所也一俯一仰無非
精神之參會非惟慰其遐思抑將藉是以勵夫所學期
克肖乎先人予雖耄矣此心不敢忘子幸為辭刻諸亭
上何如漁曰傳有之舜食則見堯於羹坐則見堯於牆
古之上聖猶若斯况下於此者乎人子之於親遇事觸

物無有不可感勵者況親之昔日所游歷者乎斯亭之
建當與甄氏思亭並稱其視崇臺芳榭以騁游觀之娛
者果何如也若先生者豈不為孝敬之人哉先生字杞
山觀其名也學問富而德行修踐揚中外其善政蓋章
章云辭曰

崖之雲兮英英其升崖之木兮欣欣其榮
悵仙人兮何之
颺風薄而上征豈降精而委祉兮
發為休徵三秀之茁兮膏露之凝
渺長思於無窮兮視一息於千齡
金可

銷而石可泐兮又焉能爽吾之精誠

著存軒辭

并序

瑞安裴中季和以學行推舉典簿成均扁其軒居曰著
存不忘乎親也御史中丞劉君伯溫嘗為賦詩以寫其
情予復師伯溫之意演為琴操三解使季和援琴而鼓
之琴悲而不成聲聲信不能成也嗚呼孝子之思親果
有終極否乎其辭曰

人孰無親兮我視歸于黃土六合之間兮莫過我最苦

風獵獵兮成音雲族興兮晝陰我親何在今涕泗霑襟
我親雖死兮我心不死開目則見兮威儀孔邇何俟當
祭兮始如見之彼蒼者天兮悠悠我思

求親冥茫兮曷求於身我身即親兮一體之分戰兢保
持兮厥德維新毫髮不敢愆兮懼傷乎親上慎旃哉兮
此謂著存

孤憤辭

并序

中州人士有無罪而被廢斥者識與不識咸寃之瀟因

本其志為著孤憤之辭使世之用法不慎者讀焉其或
知所懼也夫辭曰

哀予生之匪淑兮耿鬱紆其誰語恐此心之難白兮假
微詞以自吐曩有志乎學古今指前修以作則非秋蘭
奚敢紉兮非申椒吾馬食伏所履之正直兮謂無施而
不可悲世塗之嶮巇兮習獨中茲危禍胡萋斐之小文
兮竟成之於貝錦剛指方以為圓兮揆人情為已甚伊
翩翩之公子兮余素得而友之握手以示肺腑肝兮若斷

金而弗疑何中心之多變兮一旋踵而弗予識既擠予
於坑穽兮復彎弓而下石汝面目之無怍兮曾何謀之
弗深縱禍予其曷傷兮吾懼戕汝之良心覩日月之光
昭兮聞雷霆之隱耽予固不足畏兮汝寧不畏于天天道
微而難索兮斯焉足以責汝彼黃鳥之嚶嚶兮猶求友
而弗止將七尺之美軀兮乃一禽之不如予固約結而
罔措兮又為汝而歔歔嗟受命之偃蹇兮豈獨汝之為
尤蛟龍鬪於深淵兮寧無損於鱗鱗汝雖不我陷兮予

安往而逃囚唯飲泣而無所訴兮傷予罪之不當蒼天

之至明兮獨不鑑我之幽枉

叶於良切

皎皎之白璧兮僉訾

其為燕石也纖纖之素縞兮反謂其如玄漆也欲力詆

以深文兮其奚患於無辭咎繇之不吾出兮眼有淚而

誰知誓剖心以自明兮念父母之所遺苟雉經於溝瀆

兮慮君子之見嗤夜漫漫而不旦兮悲風颭其四來秋

蟲響於空堦兮似助予之悲哀六合之至廣兮寔一身

而無所魂魄恍恍若有忘兮雖生存而如死昔公治之所

遭兮夫何有於不仁在縲絏而非罪兮亦魯叟之所稱
果自反而弗疚兮縱遇辱其如榮浮雲過而日潔兮春
冰釋而水清外累不足以爲懼兮懼吾德之未明意欣
欣以超絕兮振冠纓而起行取瑤琴以彈之兮有和珩
之新聲樂天命以自度兮究年歲而不再更

李都尉字辭

有序

皇上即位之九年以順德公主下嫁於太師李韓公之
子駙馬都尉祺初祺小字爲總至是詔曰其易以美名

翰林諸臣乃定今名以進且字之曰子祺既而子祺請
曰祺之名實定於先生祺於先生少嘗受業有師弟
子義將何以教之余惟一代之興必有元勲厚德之人
出於其間始則佐帷幄決勝負終則坐廟堂而贊治化
成大功而享榮名為國家之柱石係天下之重輕若漢
之蕭鄴侯宋之趙韓王皆若是矣至於連姻帝室若今
太師則未之有也今太師極人臣之尊為上公之貴而
都尉子祺獨能好學慎行敦厚下人發為篇章動有意

趣是可謂富貴而好禮又難能也祺之為義為祥為吉
子祺固有以致之矣為字實宜雖然尚父有云敬勝怠
者吉此守位之事也敢以為勉焉辭曰

氣合運凝天地載清君聖臣明以階治平惟臣謂誰實
時元老運籌建略致天之討四方既帖乃戢干戈執政
廟堂如漢蕭何匪惟執政昨以大國丹書金券俾首百
辟爵則崇侯職則太師左右天子以鎮四夷四夷既安君
臣交歡上降下承煥乎榮觀彬彬都尉大寵是膺太師之

子天子之甥際茲風雲依彼日月侃侃都尉不自矜伐
文駟錦衣其儀既都出入金門不敢笑譁躑躑公子交
趨競諾都尉昂昂屹如山嶽斯時之人以恩為祥祥則
既多惟敬乃將都尉之名曰祺是命何以承之告爾克
敬庶民不敬且瀆乃家况茲世臣不敬謂何凡人有身
咸有嗜欲敬以攝之形莊氣肅自身而推孝親尊君動無
弗敬乃有譽聞敬勝者吉古有弘訓敬以承祺萬福咸
順爾克敬矣罔弗盛矣爾之祺矣罔爾違矣太師之勛

山崇川長敬哉勿忘以繼耿光

馮擇善都督字辭

并序

自昔帝王啓跡之地天必儲精聚靈使英雄謀略之士
生乎其間以備其驅策而佐其設施及大業既定爵號
之隆冠于當世褒寵之澤流于子孫若漢唐之豐沛晉
陽君臣同休蓋蔚乎其盛矣今上皇帝龍飛江淮光啓
神祚于時文武才俊鷹揚虎躍或秉鉞出征或執筆帷
幄率多江淮之人論功剖符公國侯郡者以數十計若

郢國馮公其一也郢公定遠人初從上為帳前總制親
軍都指揮使立功草昧時不幸早卒及上即位追爵為
公命其子誠侍青宮執業讀書及誠既冠三擢遂僉大
都督府事而誠之季父初襲郢公職累建大勲亦啓封
宋國一門二公誠又位在樞府敏事慎職為上信任天
下榮之誠篤好問學能為詩章以嘗受學于予間來請
曰誠之字曰擇善未達其義願有以教之乃為之辭曰
江淮之間真主生焉乘風附雲實惟英賢侃侃郢公熊

虎之姿大劍良弓拍麾義師孰與其才不賦以壽騏驎
萬里償于中道壽雖不延有弟克膺有子克承以宏厥
聲烈烈宋公為郢公弟惟都督誠又克為子為他人子
名實易稱保國承家厥惟難能上則天君下有衆庶苟
弗以誠曷以宅位惟誠之德貫通于天何感弗應何鬱
弗宣天以至誠庶物乃育三光無愆四序靡瀆苟或不
誠宜暑而寒火其怨嗟歲功斯壞况我伊人不誠其可
矧爾世臣爵祿是荷爾或不誠民胥爾尤誠而無擇為

僻為謬古訓孔多維人攸踐我將曷從維擇其善惟忠
與孝則允蹈之維悖維惡絕而弗為蹈之匪艱服以悠
久木升川增山立海受既擇衆善乃立爾誠乃保厥家
乃篤鴻慶以之事君為臣之良以之立身為邦之光匪
光于邦丕爾先人郢公有子聖主有臣

張孟兼字辭

并序

國子錄張君生於歲戊寅正月六日以厯推之是月九
日始入春則中氣猶居丁丑年之冬其大父府君因以

丁命名張君既長聞人先生字曰孟兼兼者何謂臨二
歲之中也夫丁在十幹為火戊則土也火為文明之侯
非不燧然有光必變而為土然後生物之功遂張君以
辭章名世今將刊其華而食其實乎雖然丁離象也戊
坤象也離上而坤下於卦為晉彖有之明出地上順而
麗乎大明柔進而上行張君又將自此而升乎方今大
明御世治具畢舉張君益昭其明德發為人文以黼黻
王度物有不資其成者乎是則兼之之義已或謂殷人

尚質多以十幹名其與府君之意則夙然殊也張君浦陽人有學行與濂為同門朋辭曰

戊為子丁為父火得為土百物之所祖能兼之道為伍

趙廣字辭

并序

浦汭趙志道氏衣冠之望族也有子曰廣求予為之字予謂廣之文從广從黃广則因厂為屋象對刺高屋之形而廣則諧聲也許慎以屋之大者為廣實有容受之義焉請以子容字之何如志道曰善矣乃為之辭曰

人之隘也爾則廣之人之拒也爾則容之惟廣惟容吾
將見爾德之豐

鄭仲昭字辭并序

詩云倬彼雲漢昭回于天說者謂雲漢天河也夜晴則
天河明其光隨天而轉也雲漢然矣揆於心之靈明其
有弗同者乎予友浦汭鄭君以漢為名內翰柳先生字
之曰仲昭間來徵予言予聞制字必有祝於是稽諸詩
義而補之以辭辭曰

五禮攸建冠為之先備物祇事無一或愆筮期宿賓列
器布筵弁間皮爵裳錯黃玄組纓屬缺跽幹用延尊甌
有禁柶解斯甄離肺克昂乾肺實籩嘉爵既祭工祝乃
傳造字命辭厥義則宣維天有漢灝氣成川衝角奠軫
貫乎宿躔夜翳既歛若練在縣隨時運行素色連娟微
諸人心同此皦鮮森列萬象徧燭八埏出王游衍與天
周旋有媿鄭君世胄蟬聯十世同煬義聞四傳君實纘
之裔曰象賢圖之田之家政爾肩泰之昭之先緒愈綿

惟廉則礪惟溫則瑄處乎正中有赫其平漢名昭字佩
服允堅一理是循顧謏匪偏相彼先民日夕乾乾一事
或悖六鑒相挺君宜自勗弗懈益虔器服有銘在古則
然敢補祝辭以代韋弦

黃瑄字辭

宣之為文上從一而下從二從囙乃取風囙轉以宣通
陰陽之義尋復借為布為緩為明為徧不一而足若加
之以玉則又為瑄蓋玉則象形宣則諧聲也爾雅云璧

入六寸謂之瑱漢代郊祀則有司奉瑱玉而瑱又通作
宣然則瑱玉者亦玉中之最貴者歟先師黃文獻公之
嫡孫名瑱濂因字之曰伯宣且勗之曰天地之間貴者
為玉賤者為石石譬則小人玉譬則君子也爾瑱出自
瓊瑤之林人固曰此玉也非石也玉則玉矣曷益之以
礪琢之功乎不然則玉徒玉爾器云乎哉雖然器幸成
矣復局滯於一而未能無施而不當也瑱乎瑱乎其用
是而自勗乎嗚呼文獻公藏器于身出而薦諸郊廟非

特器而已也有如辟羨起度凡諸玉之用規矩皆自其中出爾瑄慎勿愧之瑄乎瑄乎其用是而自勗乎漁老門人也故於瑄不敢褒而敢箴系之以誦曰

璧大為瑄孕諸石孚尹夜氣吐秋魄薦郊莫廟神鬼格其儀夔出犧與帛婉義配名到幽蹟爾性爾繕靡朝夕予言服膺宜無斁

臧士幾字辭

并序

臧君哲字曰文濬密人也以儀曹屬時詔為司諫然其

為人秀穎而嗜學賢士大夫愛之頗謂其名若字皆盛
德事殊非所以自稱蓋更之君來請於予予摘程子哲
人知幾之義字曰士幾幾者善惡之發榮辱之主也可
不慎歟慎之如何曰誠而已矣作字辭辭曰

心神變化乘氣機弩牙既幹鈞石隨或黑或白迺異岐
君子防之樹城碑嚴以金鼓列旌旗百體從令志則熙
尚慎旃哉無殆而

黃仁淵靜字辭

有序

建安才俊士曰黃生名汶仁負超羣之資朝出受易於部使者陳孟龍至暮抵舍復質所疑於仲父居德亦奇男子年十六時中私試高等諸老生不中譁于庭居德因請面試上官前譁者執筆不能下面頸發赤以出以故生內外皆得師學之日進如水湧雲集洪武辛亥秋有司賢之以生名上福建行中書試藝棘闈八府之士充貢者二百而司文衡者又前進士林以順吳尚志郭麟江惟志也取舍甚嚴或懼不獲在茲選及榜出三十人

中而生名居其四遂為易經諸義之冠生之年始弱齡
耳明年會試南宮銓曹急於用才不俟再試擢奉常贊
禮郎階入八品有職之士無不為生榮雖余亦愛生甚
時以問學最之生因執經從余學間拱手而言曰仁初
名文仁有司援例以文犯固西伯之謚加水於其左及
解名上中書吏以白右丞相汪公公曰仁之義甚弘無
所不包其可冠以汶字乎宜去之先達因取魯論仁者
靜之言字以淵靜願先生詳發其義嗚呼考亭朱子釋

此至矣余何以言為雖然不可無以荅生之意生之賦
資固超羣而求仁之方不可不力也為序其事而申之
以辭曰

仁體凝重屹弗遷振古雄峙如山然生意周流踵至顛
一息有虧用則愆爾生心澄靜若淵萬象森列具不偏
返觀冲漠無後先其機或動矢發絃雲行雨施出自天
神功不宰超虛玄全體大用昭以宣上師周孔下淵騫
縱不及聖肯下賢流光不駐若電煽生其夙夜加勉旃

張肯字辭

并序

古者冠而字敬其名也三加之後必為字辭以祝之或稽於經或據於史凡可以繕性禔身者無不可也由此觀之非惟敬其名抑且以敬其身能敬其身則成人之道具矣姑蘇張君云已敦實有學之士也嘗名其子曰肯又以繼孟字之蓋取書大誥之義也雖加冠於首而未有為之辭者請余補之余雖弗獲從大賓之後與聞酌醴之事然與君已友也輒陳所見而告之其辭曰

冠禮之重為敬其名苟非其人禮弗虛行伊張氏子世傳以經名子曰肯厥義則宏吾為爾陳聳耳而聽有法於先爾基爾楹有菑于前爾播爾營勿違厥時必將必迎勿闕其成載厲載興茲為善繼父事是繩前者有作後或匪承此謂悖則溺於淪冥規既我蹈矩復我程此謂順德令譽日增二塗之間美惡所形擇善固執弗撓而傾况爾秀穎如稼之青翹然獨異如木之榮棟梁斯任倉困載盈上慎旃哉學惟烝余言止矣爾其服膺

王宗器字辭

并序

王生璉字宗器其先太原人今家濟南之長山器局沉凝而學問精密洪武五年以易經舉進士山東名列第三既上南宮未試皇上召見便殿親命題賦詩詩成稱旨擢史館編修賜以冠服選入禁中文華堂肄業詔翰林老臣為師同時而進者凡十又七人車駕時臨策勵之且取其文品評其優劣日命光祿寺給膳羞酒漿每當食青宮暨親王迭為之主而璉等侍飯於左右冬夏

賜衣各一襲復有白金弓矢鞍馬之頒蓋不一而足近
又使璉攝御史廉察河南迨歸奏對益稱旨上悅謂近
臣曰文華堂諸生如璉等者皆朕異日將相材也其期
望之重如此璉嘗從余學故來以字辭為請予因序璉
遭逢之盛於首而著命名制字之義於辭璉能聽之必
上不負於國恩下不負於所學矣辭曰

宗廟之器貴盛實殊夏有四璉殷稱六瑚周云八簋異
名同符其貴斯何珠玉為飾其重斯何盛以黍稷嚴奉

明裡神鬼是格惟端木氏才堪三卿文章外見以言語
稱汝器見許載諸聖經今生既長局度純亮發為辭章
大河奔放器字璉名父師所望出逢盛治講學禁中天
日照臨以煦以融以達其衷用廓其蒙學之茂矣川之
流矣材之秀矣木之備矣蚤夜孜孜唯道是求矣豸冠
魏我巡行洛河貪夫夜逃良士笑歌君子之為君子之
多學無止功非盡斯善辟彼行塗足不留踐百里至千
所見逾遠志安於近行局一偏笙罔為鏞豆難充籟規

模卑狹世則病旃德藏于身動無不被厥用能周由體
斯具生尚勗焉庶幾不器

王生致速冠字祝辭

并序

虎林王生其幼也父命之名曰驥及年寢長加元服于首
大賓字之曰致遠蓋取梁徐勉所謂人中騏驥必致千
里之言也按說文驥千里馬也孫陽所相者其字從馬
冀則諧聲夫千里馬不常有以謂世之奇才亦未嘗數
見也以生名若字觀之則父師所期望者不亦深且長

哉予雖不及與聞三加酌醴敢抽蕪思而弘敷其義生
宜聽之母忽其辭曰

古者體物取義孔殷麟紀其瑞鳳揚其文表厥茂實載
敷清芬其惟馬之族本非一類八尺為龍千里曰驥因

生有別挺材見異其二伊驥斯何墮地不毛虎文彪炳龍

骨陂陀天機趨騰絕塵飲河其三當其奮飛神行電逝若

滅若沒一日千里晨燕脯越視同遊戲其四誰其似之渥

注之姿肉角飛黃逸氣纖離天閑翱翔玉臺裴回其五奚

官善馴是潔是拂秣以美薦飫以香粒筐惡蜃洩慮無弗

及^其物尚有茲人胡不如天賦權奇孰不自攄口噴紅

光長鳴九衢^其豈無王良俾其振迅未必監車能厄神

駿三羸五駕過者誰問^其生游藝府逸思超羣剪水為

神製霞作文亦既應書名達帝宸^其侍禁藩王出入禁籞

宮袍時頒太官致餽寵賚之隆揆古無愧^其以利天下

易經有辭取譬奔蹏漢詔以之任重道遠生寧弗思^其

一曷以思之朝夕兢惕匪力足矜所稱惟德予言非誣

勗之無數

其十

宋惟善字辭

并序

宋氏自京兆遷汴又自汴分遷吳興虎林虎林有名善
字惟善者實承其後吳興則再遷金華而予之遠裔也
予與惟善為同宗予侍講禁林日惟善以學行貢諸朝
皇上親擢為給事中朝夕在帝左右時被顧問恩寵有
加焉已而兼靖江王府錄事擢監察御史改知濟寧府
未上陞參山東承宣布政司政事予與惟善為同朝瀕

行惟善來言曰善以字辭為請已二年矣叔公文墨之
冗日弗暇治因未敢累執事今將有遠行叔父寧終靳
一辭乎予笑曰惟善通書工辭章經緯叅伍燦然成文
持節行州縣彰善瘴惡又愜乎物情是文學政事舉
勝於人縱予有言將何有裨於惟善乎惟善請之益
力予不能牢讓因稽其命名制字之義綴之以辭辭
曰

陰陽迭運道寓其中繼之者善性成乎躬其善伊何

化育之妙陽行陰具萬理樞要是曰天道體用弗遺式
昭化源用樹學基有倬君子夙著徽美內功既加外聞
益侈積久發弘上簡帝衷峻爵穹官日致顯融君恩如
天無不覆燾昧昧思之非忠莫報往佐方嶽審其政機
大見設施春煦秋威孰滯盍疏孰蠹盍剪孰才盍登自
邇及遠此非外鑠實善之推成已成人庶其在茲我著
我辭徵厥名字揭諸座隅以示籤史

補張馮加冠字辭

有序

瑞安張生馮宋金部郎中聲道諸孫也以文學薦於朝
擢奉常贊禮郎奉常所典祀天神饗人鬼祭地祇之禮
其責任為甚重馮能周施佐助而無越禮愆度君子稱
之馮當冠時大賓字之曰子翼而未有造祝辭者邇來
監祀廣西行中書省叅知政事黃君子邕嘗為推說字
義而序之馮事予頗謹間復以祝辭為請予按士冠禮
載其三加之辭甚具辭古也而字說則今也予雖不敏
弗能從大賓與聞制字之義馮之意難固拒也遂弔勉

以補其辭辭曰

冠而有字為敬其名曷為敬之期學之凝學將焉施莫
重夫祭大嘏之受因神所致孰有賢行慎擇為尸豫撰
厥凡庶堪馮依豈惟佐食宿有命戒皇尸戾止益虔弗
懈侶侶工祝左承右趨既贊道之復扶助之馮之謂何
如神斯據翼之謂何如鳥展翅百靈繽紛儼乎若臨洞
徹上下精白一心詩咏卷阿歸于孝德放諸四海準是
為則爾職贊禮陟降廟郊周折圓方弗訾絲毛非志之

醇疇能及此宜勵其功慎終如始自此而推泉達火然
孝親忠君其道一原內涵外充壹循乎敬大本既敦末
罔不正爾有長才發軔在茲何遠弗屆何福弗宜探名
索字孳孳不已賢亦何人希之則是

鄭氏三子加冠命字祝辭

有序

浦陽孝義之門曰鄭氏其十世之長仲德甫筮得柔日
宿余為賓將冠其從子木杲果余親與之周旋降升以
成三加之禮於是稽名定義製字命之夫平土有叢為

林因字木曰叔林日在木上為杲因字杲曰叔昇丈夫
致果為毅因字果曰叔毅命已遂通祝之以辭辭曰

三加三醺既備禮儀昭告爾宇各宜聽之木從地生含
和茹茲孤撐非貴叢生乃奇蔚若鄧林陰陽蔽虧欲構
清廟掄材實宜毋學樗櫟擁腫離䟽為世鄙賤工師莫
窺木其勗哉夙夜克治杲杲出日新陽則微及昇扶桑
其光陸離婉諸靈局皦然弗緇羣昏既歛洞察毫絲毋
若小夫中霄而趨擿埴索塗陷於滂痺杲尚勗哉賢哲

自期人之立志樹德為基唯果而毅篤行不疑譬之大
將建以鼓旗奮矛爭先矯亢欲飛毋習巽懦如脂如韋
聞過罔悛媿嬰委蛇果尚勗哉振厲有為爾三子者昧
昧以思彼蒼者天體物無遺或出或入靡不爾隨尚滌
爾心一髮不私履善蹈道君子之歸苟務口耳言從行
違奚翅犢禽安於鬚眉世之恒流父子異炊脫有不善
衆方見嗤况爾旌門十葉聚居名播寰宇彤筆所書尤
當戰惕若臨險戲遵厥祖武全其秉彜羣翔于堂東墀

西簾獨行於庭左矩右規庶幾無愧七尺之軀予年耄
矣百艱備罹涉事既廣理能真知諄諄爾誨辭肯貢諛
請書座右視如嚴師

鄭柏加冠祝辭

有序

浦陽江上有旌義之家曰鄭氏其子姓多從余游有名
洧者執經為最久近又携其子柏請曰柏加巾時賓字
之曰叔端而祝辭尚闕願先生追補之余聞記禮之家
以竹箭有筠松柏有心居天下之大端故貫四時而不

改柯易葉蓋喻人之得禮則內諧而外無怨言哉言乎
今柏之門內外邕穆且十葉聚食矣非禮有以管攝之
惡免無平盤哉夫端者本也釋者謂四物最得氣之本
用此而不變傷以端為字配名實宜於是申之以辭辭
曰

齊家之道人情為田修禮以耕耒耜用宣疇其蕪穢灌
以淵泉時功既施遲彼有年逮其大備食之肥鮮稽類
取譬栢號最堅暨于松筠同得氣原青貫四時柯蕊葉

芊外柔內澤本固末綿我挈其綱物莫敢先藉禮為政
孰謂不然民則底定天和斯全釋回增美植正斥偏情
通上下曾無間言揆諸稼事理不少愆爾生鄭柏紳綏
蟬聯由禮達義世已十傳煦然春溫嘉生縈駢旌書煒
煌降自九天爾生已冠學維箋箋朱蜃漆鬣玉潔珠圓元
賓加布三祝于筵取端配名勗爾致虔當為鬯曰與鬱
回旋勿隨鮮葩銜竒競妍此謂敦本確執弗遷循名責
實夙夜乾乾祝辭止斯爾其勉旃

補臨川危安子定加冠祝辭

有序

冠者責成人之道其禮自天子至于諸侯卿大夫士各有隆殺之節儀文雖已失傳唯士冠禮獨存告廟筮期宿賓命贊弁有皮爵之等裳有黃玄之錯器有尊甒斛解之用鼎有乾肺離肺之實三加而彌尊制字以敬名其為禮甚嚴矣夫何故事親從兄忠君敬長之行望其有所成也古昔盛時以冠為諸禮之首者其職此之由歟自冠禮久廢風頽俗靡冥然夜行如擗墮而索塗君

子未嘗不為之永嘅也臨川危生安清敏好脩為文辭
亦整綴可觀嘗從郡諸生肄業成均學士大夫多延譽
之其師曾先生旦初為字曰子定來謁禁林求予為之
說予謂字之有說說文解字脩述之矣何假人言哉然
三加成禮之後既命之字必造辭以祝之是猶可為也
於是歷序冠禮之嚴定字代名者為甚重繼掇大學知
止之義而申之以辭生慎聽之其將躋君子之域矣乎
其辭曰

人之初生父命其名弱齡攸屆乃以字稱此非彌文實

厚彛經四行之責用底于成其一爾生名安以定為字稽

諸聖經敷列其義必先知止始奠厥志射有正鵠直趨

而遂其二方其未定逐物而搖紛紜舛戾水湧風飄及既

定只類鑒孔昭事至則應順而不膠其三曷為致斯因靜

之故靜為動基理罔弗具辟地博厚發育萬彙區萌畢

達隨風而布其四靜主乎內靈扁廓然靡隱靡顯隨寓而

安天光照煥人滓將刊漸獲所止斯不為難其五惟古之

學明體適用出輔邦家瑞若麟鳳逮求後世葩藻是弄

誇多鬪靡有如聚訟

其六

昔我臨川學者所宗仰視陸子

其猶神龍駕風鞭霆雨于太空被其澤者碩大而充

其七

憫彼夸毗以華喪質直究本心皎如出日微言猶存可

以尋繹生居其鄉敢不自力

其八

爾生長矣熒如秀榮濯

濯而明英英而貞從師受經咏其至精亦既有文五色

交縈

其九

我後賓贊不與酌醴今補祝辭庸申規厲行固

宜篤知亦須至安定其中聖域可企

其十

東湖先生方君招魂辭

有序

至正元年春東湖先生年過九十貌加癯而神益腴一
旦合賢士大夫于庭先生被古冠衣出肅賓升堂已復
揖賓咸東向坐顧外孫楊恒執豆籩乃從容舉觶而揚
言曰老夫耄矣其去人間世不遠矣私自念陰陽之運
相摩相盪而人實藉是以成形有生者必有死暫聚者
必終散嘗昧昧思之上自頭顱齒髮下自肩髀腰膂不
知何者為可藉何者為可恒乃欲長生坐閱世而不死

乎予每讀古書見所謂豪傑之士不可勝數或提三尺
之劍擁百萬兵啗噉叱咤而江水為之湧起或掉三寸
舌高軒結駟游騁於諸侯之間亦足以懾強而下敵若
而人其材畧雄矣其精魄勁矣吾將求而與之游則已
蕩為飄氛而無致詰矣嗚呼世之人凡以有涯之身與
無涯敵者皆可悲也是以榮啓期林類之徒有見乎此
或被索鼓琴或行畦拾穗雖至老死不以戚戚少嬰其
心予竊慕之嘗聞古有虞殯之章蓋羣歌以輓櫬于塗與

其施諸死後之鬼孰若予親見之賢士大夫若不予棄
宜賦詩以輓予予當乘安車而出使善音者道予而歌
予且擊輪為節以應之是未必遽減於秦淮海也賢士
大夫若從予言願舉此解為賢士大夫壽衆皆曰然先
生既行解已又舉解言曰賢士大夫固輓我矣予又聞
古之人有遭讒放逐者或閔其魂魄離散而不復還作
辭以招之其人初未嘗死也予雖無放逐之憂而其精
神皆已斃竭筋骨皆已罷憊顧未死耳幸未死有能辭

以招我庶幾翩然自適與夫既死而有靈亦御雲龍而
一下聽之又未必不嘖然而笑也此非屬吾景濂而誰
為願舉此解為吾景濂壽濂又曰然於是賢士大夫執
解以酢先生且各謨歌詩一章以進濂因製為招魂辭
云先生名宋字德載姓方氏越之暨陽人其行大畧見
於延陵吳公所著碑銘辭曰

魂兮既徠毋遠征些上下八極皆朦冥些華山如雲倚
空青些下有芝房炳明靈些白間綺䟽紫檀扃些銅龍

承樞吐赤瑛些繡帷高塞耀輜軒些綠蛇衛轂若流星
些淳熬熊膈溢鼎鉶些狼臍凝膏如玉晶些九霞玄冠
五綵綖些麟衫麕裘光熒熒些玳瑁合節鏘瓏玲些離灑
巢和一齊鳴些沂韶飄聲發繁聲些趙舞激風肖霓裳
些秦歌嫚迴近懸瓔些室中百具無一不精些中天化居
能及此清寧些魂兮歸徕不越故庭些

哀志士辭

有序

奇俊之士無世不生特時人弗識之或識之而弗能用

或用之而弗能盡其才所以聲光不流於當時事業不
白於後世予竊悲之庚寅之夏因覽元好問所錄入之
諸儒自辛愿而下凡五人見其氣節剛方言論磊落實
所謂奇俊之士者也雖其行事或未能無過終非齷齪
陳腐一蹶不振者所可冀其萬一然恨其有志而不能遂
也因掇其大畧隸於各人之下又從而哀之以辭

辛愿敬之福昌人年二十五始知讀書音義有不通者
搜訪百至必通而後已由是博極羣書且善於文辭尤

以是非黑白自任每讀人詩必為探源委發凡例解絡
脉審音節辨清濁權輕重片善不掩微類必指如老吏
斷獄文峻網密絲毛不相貸雖貽人怒罵不恤也性踈
宕不修威儀貴人延客愿麻衣草屨足脰赤露坦然於
其間劇談豪飲旁若無人家甚貧衆雛嗷嗷張口待哺
素負高氣又不能從俗俯仰其枯槁憔悴流離頓踣一
假詩以鳴雖百沮之餘其耿耿自信者不少變元光初
李獻能元好問在孟津愿往見之獻能為設美饌愿放

笑嘆曰平生飽食有數每見吾二弟必得嘉食明日道
路中又當與老飢相抗去矣會有一日辛老子僵仆柳
泉韓城之間以天地為棺槨日月為含襚狐狸亦可螻
蟻亦可耳聞者悲之辭曰天生爾才胡不汝騁麻衣如
墨下不掩脛下不掩脛不過寒我我食無所我生其可水
豈無藻山豈無薇苟非吾有我敢采之市魁屠伯彼豈無食
我腹雖虛我腰肯折抱節而終我則奚憾烏鳶螻蟻上
下何辨爾貧固甚爾守則多不疑而富其如爾何

李汾字長源平晉人曠達不羈好以奇節自許避亂入
關關中無一人敢與相軒輊者元光末用薦書得從事
史館從事職名謂之書寫特抄書小吏耳汾素高亢不
肯屈世乃今以斗食故人以府吏畜之殊不自聊館中
諸人又多新進小生史家凡例或未能盡知就其所長
有不滿汾一笑故刊修之際汾在傍則蓄縮慘沮握筆
不能下汾正襟危坐誦左丘明司馬遷文數百言音吐
甚洪暢誦畢顧四坐曰看秉筆諸人積不平乃以嫚罵

官長訟于有司證左相半踰年不能決右丞師中遣東
曹掾置酒和解之尋入關驅馬來京師日以馬價佐歡
道逢怨家則畫地大數而去會恒山公武仙在鄧汾往
說之署行尚書省講議官既而叅知政事思烈與仙相
異同懼汾言論遂害之汾孝友廉介過人者甚多寧寒
餓而死終不作寒乞聲向人又善為詩清壯磊落有幽
并豪俠忼慨之氣人以是稱焉辭曰奎星光光今何其
昏大河東流遑恤無人金匱石室藏我冊書豈伊羣兒

所堪穢之我言弗信弗信從汝丘明雖鬼其文不死既
不我嘉覆謂我僭我視我觚有淚如霰黃霧四塞黑白
誰分彩鳳無華山貍有文悠悠蒼天曷其有常自古莫
不然爾又何傷

劉昂霄字景玄一字委房陵川人聰明絕人或戲取市
家日歷鱗雜米鹽者令讀之一過無脫遺者故其學無
所不窺六經百氏外世譜官制與兵家成敗為最詳為
人細瘦似不能勝衣好橫策兀坐掉頭吟諷幅巾廣袖談

辭如雲四筵聳聽噤不得語遇其飲酒眼花耳熱後其
鋒愈不可當不知去古談士為遠近餘子不論也嘗用
門資叙調慶陽軍器庫使不就諸公方薦試宏辭未幾
卒辭曰陋儒拘拘以簡為常目視環堵不知有四方狂
瀾既倒誰復迴之氣蓋一世獨爾能之上自黃虞下迨
五季一隙必燭何有幽邃或觸其機談辭如雲誰非男
子有舌無聲我豈誇多我豈鬪靡一物不知吾儒所耻
獨立千古上遡寥絕爾身雖窮爾名豈滅

雷淵字希顏別字季默渾源人崇慶二年進士授涇州錄事不赴改東平府錄事以勞績遙領東阿縣令東平河朔重兵處也驕將悍卒不可制淵出入軍中偃然不為屈不數月家有淵畫像雖大將亦不敢以書生遇之調徐州觀察判官召為荆王府文學兼記室叅軍轉應奉翰林文字同知制誥兼史院編修官拜監察御史巡行河南榜掠賊吏風采凜凜蔡下一兵與權貴人有連時以藥毒民家牛馬以小直脅取之淵捕得數以前後

罪杖殺之老幼聚觀交口稱快然亦坐是失官尋用宰相侯莘卿薦除太學博士再遷應奉終于翰林修撰累官大中大夫先是正大間元兵突入倒迴谷勢甚張平章芮公逆擊之突騎退走填壓谷溪中不可勝算諸將議不定釋之勿追淵請急殲之主兵者不能用後聞北兵狼狽而西馬多不暇入御始悔不從淵言淵學甚博文甚奇為人軀幹雄偉髯張口哆顏渥丹眼如望洋遇不平則疾惡之氣見於顏間或嚼齒大罵不休雖痛自

摧折卒亦不能變也食蕪三四人飲至數斗不亂生平
慕孔融田疇陳元龍之為人雖其文章號一代不數人
在淵仍為餘事耳淵之友高廷玉李純甫亦以奇節自
負人號之為三傑云辭曰爾心之勁爾氣之剛嫉惡如
仇不問暴強將指出巡面冷如鐵霜簡所加邪蒿即折
才豈止斯兵筭又長眼見千里孰曰不明志不獲伸多
士短氣其書徒存九原能起埃風四來式脂式韋有髯
如戟妾婦之為我俗之昏誰復繼君茫茫九州敢謂無

人

雷琯字伯威坊州人志英邁博學能文以薦書從事史館調八作司使初并州李汾與琯同在館中以高蹇得罪琯往送之信陵携酒酌魏公子墳握手痛飲後去客陽夏以鞭擊酒壺作楚聲歌自言去國十年甲兵滿天地短衣匹馬來自西北將起楚漢間奇才劍客與游而不可得當是時金已遷汴大河以東北盡山東西抵關輔大軍長驅徙少壯數萬人殺之居庸關外自黃河洛

陽三門析津至丕之源雀鎮凡二千餘里潼關一帶西南邊山大小關隘亦一千餘里各分地界統以總帥夜則傳令坐守冬則燃草敲冰兼以關輔大飢秦民死者相枕藉瑄皆悲之作商歌十章寫其情曰秦予父母國也而一至此乎竟淚下不能食乃出奇策白宰相宰相不能聽瑄去不知所之辭曰北風泱泱海水為竭俯窺神京不隔一髮舉鞭擊壺歌聲愈苦來自西北短衣足馬我淚既盡以血繼之天門九重曾莫聞知孰秉國鈞

我將自薦反謂我狂斥去如箭商顏有芝曄曄粦粦可
以葆神可以樂飢長往不返誰甘幽深赤日在天庶明
我心

葉深道哀辭

有序

烏傷葉君深道字逢原沉確而有文生與予友也死則
哀之以辭辭曰

綢山孤張華川潄水動溶漾元精煦嫗育裔蟬聯為里
望回鑾有䟽輓漕有猷效忠亮君出其後丕續遺緒宜

炫燿胡為躔延決瘍潰疹關難鬯長始知學優游厭飫
敢虛曠朝蒐莫擿會其肯祭搯其肮業成攷畜如矢箴
箴弓入韞室廬枵然有衣一襲履一量不隨游塵上下
鼓舞相頡頏嗟予寒僮感今思古徒慨忼辟諸豫章絜
之百園逢哲匠愧彼紛紜妄厠壘洗忝盆盍抽闕啓鑰
浸漬薰蒸予儔相天胡難知木邪制土病腫脹呌呌輶
轉晝夜變幻熱以瘡疾勢漸革魂氣隨風恣飛颺楔齒
綴足鬢弁纓中禮是傍善人宜壽卒就黃墟永淪喪相

此小夫露牙揚爪學豪放手足胡越豈知五倫為世
障胡不顛蹶反使亂真日趨妄嗚呼噫嘻君今逝矣予
馬仗制服總麻存慕音容哭相向玄雲漫漫涼風瀟瀟
吹總帳我詞之哀君知不知倍悲愴

蔣季高哀辭

有序

至正丁酉秋七月壬午瀟畏暑被髮行青松間忽有客
自東陽來曰蔣季高氏歿矣瀟聞已哭之哀哭已進客
問狀客曰前月戊辰季高以事如縣中已已即有滯下

之疾晝夜之行餘百久之熱發體中如火其兄伯康懼
亟呼醫視之醫至脉已絕矣自己巳至今月甲戌僅六
日而遽至於亡濫聞已復哭之哀乃尤天曰嗚呼悲乎
不知何繇而夭吾季高乎使季高其行負天地愧神明
夭之可也季高恂恂儒者非其道弗言也非其道弗為
也言其事親則孝而恭處伯仲則穆而和交朋友則信
而貞遇族姻則惇而莊接閭黨則惠而慈求其致夭之
之繇無有也今季高何為乃邁爾乎豈高高在上果不

可必乎抑其視夢夢不能別善惡乎所謂天道常與善人其尚足徵乎嗚呼悲乎初濂年二十餘頗嗜學聞文懿許公弟子三衢方先生以性理學講授東陽之南溪徒步往從之游先生所主蓋蔣君子晦家子晦季高父也濂因獲交季高父子門時季高尚未冠即能執經問難進退雍容肌肉若玉雪可愛歲幾何既哭其父今又哭季高焉則夫人世如傳舍者可不信乎嗚呼悲乎季高篤意於學方先生既沒復負笈師事侍講黃公會濂

亦執洒掃之役於公門與季高交益密季高日出所為
文皆雅馴可傳誦漁甚敬之每一會繡湖上輒握手吐
肺肝間酒酣氣豪競出慷慨背俗語季高喜益與漁親
季高善辨說衮衮數千言不休漁不能屈每務力勝之
於是各大笑而止且曰良會不可數一嘻笑一怒罵皆
別後之相思當時出此言亦以為常豈知別後之相思
者乃為死後之相哀乎心雖如鐵石其不為季高一酸
辛乎嗚呼悲乎去年之春季高有書來曰東西二峴山

無君足跡十年矣縱不為吾行其可貽山靈之所笑乎
漁方閉戶著書跬步弗妄出不及如季高言漁所居實
浦汭青蘿山山中林樾蒼潤孤猿野鶴見人了無驚猜
意而梅花泉又極可飲漁自念雖不能為季高往季高
清俊士折簡招之或可一來當共飲水哦詩或投壺白
雲間亦一樂也豈知季高遽棄漁而長逝乎峴山之蒼
翠固在眼寧不對之墮淚如襄陽乎雖欲重登顧後瞻
前而季高不見又寧不為之感慨乎嗚呼悲乎季高之

太夫人年踰八十母夫人髮亦種種而三子方纍纍在
疚長者僅七齡幼者尚居乳哺中惇然可念季高之死
兩目能遽瞑乎嗚呼悲乎季高已矣瀟將撫季高羣行
為書以信後世適有故未及為姑撰哀辭一通焚之於
墓以寫中心之悲季高其能有知乎抑無知乎岱嶽可
移瀛海可填瀟之哀吾季高者尚何時而已乎嗚呼悲
乎嗚呼悲乎季高諱允叔季高其字也卒時年二十九
云辭曰

有木蕤蕤兮嗚呼將鬯其施兮嗚呼霜雪何為兮嗚呼
竟從而折之兮嗚呼天者不可知兮嗚呼千載之悲兮
嗚呼

郭淵哀辭

郭淵字濟川六人唐汾陽王子儀胤也宋季羣盜起淵
聚族共保若一障曰蔡堡六人依焉天下已定民為占
藉吏撓之民見縣有為丞相客者無敢呵相教為丞相
奴淵謂民民賤生民也奴重人奴也使世世為人奴與

王民孰愈民愧而止後樹吏吏務休息民而奴容困皆
來謝曰微君幾不免大德末淮大饑淵作饘粥食之生者
甚夥是時人多鬻子自救淵取困甚者假子養之十餘
年皆為娶婦居數歲大穰一朝縱之曰若事吾良苦及
時歸母久留為也皆涕泣曰公生我今驅我安之願留
終公身淵曰母悲後吾子孫不省將以汝為奴卒縱之
人有貰酒飲西家者已醉而出遺所齎金于門淵適見
歲弄侯之明日遺金人從西家求金西家誠不知怒以

為欺求之急西家怒益甚其人困即欲自剄方爭淵聞之遽出呼其人與之所遺金人皆驚始保蔡堡羣少年共劫一人將殺之淵呵曰此何罪至殺羣少年曰此疑狙伺為謀而將襲我故殺之耳曰吾所為相保以生誠惡死也今疑而殺人禍將及羣少年怒淵私計奪之力且追殺之乃曰吾代之贖何如羣少年喜遂免之後至昇昇市中有戴粧妝盤鬻於市者遇淵置戴盤叩頭泣曰今日遇公天也幸臨過我我有母皆願見公謝淵固

辭假以為誤去之市上老人歎曰世稱長者此真是耶
初六界北邊民習兵少文淵與父諗以詩書俎豆為業
人慕之多化者至今六多儒淵既卒其孫言抱李孝光
所造墓文請瀛哀以辭瀛未及為言客死豫章可悲也
始言與瀛游語及當世輒瞋目嚼齒語皆驚人聽者掩
耳避去及操筆綴辭則海蜃吐樓而芝輦翠輦隱見空
濛間可怖愕言誠奇男子瀛故刪孝光文為辭哀淵且
附見言事以見可哀不特淵也辭曰

有聞其先熙以申有紹其後文以彬何遏其施祿以屯

王季楚哀辭

有序

王仲淮季楚越人也其父良嘗檢校江浙行中書政成
謁選京師時季楚年方二十餘請從行既至有多季楚
才者薦其名遼陽行中書授季楚大寧路儒學正未幾
以病卒檢校君哭之甚哀既請國子監丞陳公旅撰銘
揭墓上復謂其甥方泗曰予深哀仲淮既不能壽而又
客死其二子基始八歲塾始一歲僂然也仲淮有知其

能瞑目乎聞汝交友多能文盍求辭以哀仲淮且慰我
泗來為漁言漁竊悲之初漁見季楚於泗家眉目秀整
每言輒牽引史傳幾若貫通者漁方意其必進用于時
今若是世之人欲以智力相雄長而不知止者果何如
耶辭曰

冥冥玄化孰尸其權胡予其才而不予其年嗚呼

陳子章哀辭

嗚呼吾子章竟止於斯邪始予游學諸暨之白湖而子

章實來予因獲與子章交當是時四方來者類多紈綺
之子喜眩文繡以自媚人爭悅趨之獨予之貧短衣纔
能至盱冷處前廡下四壁蕭然誰復見顧者惟子章與
予燈影相望而讀書之聲相接也予時學未聞道心頗
不能平子章嘗慷慨厲子曰子量隘矣是馬足以汙子
哉子章好使氣人稍加昵白眼視之至其去乃已予因
用子章厲予者厲之子章矍然謝曰是善教我子章自
是與予居至驩也予既還金華子章亦去越二年予再

見子章於烏傷更相勞苦子章握手顧予曰子之貧尚
爾邪子但力學天殆不能貧子也予觀子章貌加壯
其厲予一如諸暨時未幾予復西還金華又二年予束
書寓浦陽子章聞之喜以書來曰予昔在諸暨與子居
僅四月而別在烏傷未十日而別今子來浦陽浦陽予
父母邦也予家距子之所寓不百里庶幾與子少相羊
乎予亦喜當與子章時相見也又三年子章未嘗一來
予竊恠之因詢子章所嘗往來者具道子章病咯血氣

厭厭不振予謂是疾勢雖迫人得良醫可已未始為吾
子章憂又四年子章竟死嗚呼吾子章竟止於斯耶予
之交友固多矣如子章者寧幾人哉積二十年之久僅
能再見之蓋以子章春秋始壯予雖少長亦不過二三
年其與子章游未晚也豈知子章遽先予而棄去乎予
蚤知子章若是又敢憂百里之遠不與子章周旋乎子
章已矣孰能相予之善孰能指予之疵哉予雖欲不衰
子章不可得已因從而著其辭子章諱璋姓陳氏子章

字也浦陽人辭曰

已乎子章天賦爾材而鍾爾精宜乎輝赫其聲光振拔
其華英不秩登於百石亦名薦於九卿奈之何單襦短
褐不知珪組之貴藜羹糗飯莫沾鼎錫之榮雖足勩乎
敝屣神憊乎篝燈竟不少用而遂潛輝韜迹於泉扃則
吾子章何如勿生已乎子章白楊萋萋宿草莽莽悲泉
咽而不流寒雲鬱而欲聚以吾子章之才之淑而遽下
制於一坏之土寧不使予撫遺文而增慨想音容而惻

楚也耶嗚呼唏矣

哭張教授父子辭

并序

濂同縣張公繼祖力學而尚志操少讀魯仲連傳見其
排難解紛歎曰士當如是而已大德中縣有桀黠吏挾
重辟害民民悚怯莫敢觸其鋒公直之部使者時吏方
抱案在庭公面疏其奸卒置于法延祐間郡上公才行
署雙溪書院山長考第成遂調瀏陽州學教授公為復
侵疆稽其步畝刻石學宮會守貳闕太府檄公攝州事

時歲荐祲道殣相枕藉方下令勸公公為設方畧使持券者左入受粟者右出竟事帖帖無譁居二年以大父喪棄官歸卒其子道生力學如其父屢應進士舉不利困頓殊甚適余觀以監察御史行部浙東觀同舍生也召見相勞苦薦為武夷書院山長未幾亦卒初濂年幼時見公公即相器重與為賓主禮俾同道生師事城南聞人先生逮今粗知學而不陷於小人之域者皆公賜也濂既往哭公曾未幾何又哭道生焉雖石人尤當墮

淚近抱疚衽席間中夜尤念公父子不能置起篝火濡毫申之以辭辭曰

番番良士僅以教施才不盡展人期有兒兒今死矣吁其悲

哭王架閣辭有序

王君檉字德潤濟寧金鄉人祖仁義烏丞父端溧水州稅務大使母劉氏君少警敏人物又魁傑嘗掀髯自咤曰王檉不尋功名功名當自來逼王檉爾豈有錐在布

囊而末不見者耶遂學治經試進士不中即棄去攻法
家書為衢處二府吏尋補書吏浙東廉訪使者府遷浙
西名上江南行御史臺辟察院書吏已而貢入中臺察
院出調浙西道肅政廉訪司照磨兼承發架閣裨贊憲
政人器其材因會酒言忤御史銜之以事中君下符逮
就吏君坐樓上歎曰男子頭可斫膝不可屈死則死肯
與獄吏對乎遂拔刃自剄左右急救君已仆地血滂然
流君妻劉及子僧僧忍泣具棺斂載入金華即城北五

里藏焉蓋君自幼寓金華又以女妻縣人江演兵起山
東道絕不能歸故君喪來塋而妻子皆來依江初余入
郡從聞人先生學君同日至與之語又知同庚戍生人
相驩也書摩切經藝晚則捉手同游行或縱談大噓憤
墮地弗顧或聯詩纔脫口即促繼之遲則罰昏鼓動鼗
鼗始歸日以為常一旦去為吏余遂不以書記通有自
浙水西至者出君手書相勞苦且曰吾薦子於方嶽大
臣行授子校官矣子能為我一出乎余以書謝復固辭

居亡何聞君死矣余之辭君者非托此以為名高竊自
念貧賤士何往不自得君固不忘故人余足一動人必
病余以為狹且私是以弗能往視君俟君他日歸休御
款段馬候君青霞白水間未晚也嗚呼孰知君之遽去
余而死矣乎使知君之遽死也縱百千其舌以為私以
為狹朝夕迭提余耳而噪之余尚何恤必能謁君虎林
之上矣今復何言哉今復何言哉君既不可見乃絮酒
裹雞走哭君之墓僧僧知余至哭迎于途僂然也余心

益百折不自勝造為哀辭一通以洩余情雖然余情其得而盡洩乎君卒時年四十七至正甲申九月十二日云辭曰

犧尊青黃嘉木之灾樗大蔽牛不以為材使君非材行已昧昧過者弗睨孰得而害君既材矣人誰舍旃高位疾顛理之必然氓之蚩蚩匪材曷治君仕則當不仕無義孰不顯融君閑而凶豈仕之尤祗繫其逢所逢者時固有通塞亦命使之君復何惑物忌大剛不缺則利自

君取之命復何云君若居柔觸物惟忍非惟保名身何
能殞從古有言柔則詭隨縱生千齡非君所宜君死雖
亟君膝不屈君氣凜然千古莫奪人孰不死君死則寧
尚可謂君鴻毛之輕君何用哀我哀有以天方壽君君
則自死我苟無罪誰敢死余一朝之忿惜不爾思妻子
斃斃東西顛沛君在九泉亦將自悔我則深悲豈直悲
君悲法之隳法既隳矣君宜長逝彼多斯冠天亦不畏

悲海東辭

有序

王山鄭先生原善字復初延祐名進士起家德興丞轉
處州錄事有異政為衆所忌遭誣構去官尋以疾卒臨
川危君太樸病執法者不得其平為著悲海東辭瀟亦
繼作時元統癸酉冬十月丁亥也

我悲東海我涕拭矣善人云瘁邦其棘矣倬彼昊天冒
此下民彰善癉惡胡莫之懲冥冥其晝不見出日飄飄
雨風墮我家室家室墮止邦國危止豈遽危之遠將自
適大君維河冢宰維舟卿士維楫丞庶維徒上下相力

厥載孔速苟不是念不膠則覆維彼哲人化為螟螣維
彼愚人猶如鬼蜮鬼蜮戢戢巧為我賊螟螣僥僥蝕我
黍苗我民我牧唯恐傷只彼豺伊兕敢為民瘠既啜其
盲復盥其髓我寘我法孰云能已淑爾君子繡衣孔揚
有瑒葱珩有節斯煌不我能勗覆謂我爽詈我繫我絕
不畏明訾彼鸞凰見藻是食有振者麟邪蒿為室式紛
式錯動罔不忒嗚呼昊天曷其有極牲牲其鹿乃索之
江中林喬喬乃求其魴顛倒眩瞽以逞無良嗚呼昊天

曷其有常無然惛亂無然滔滔無然回遹以虹我心爾
之悖矣民胥害矣爾之迪矣民相憚矣勿曰丘陵崇不
可夷勿曰淵冰堅不可摧忽為平陸忽若流澌誰與爾
謀曾不爾思謂爾醉止默然無知爾不用酒何德之違
謂爾蠱止上下卒迷日用飲食不愆厥初其止蘧蘧其
行踽踽其慘喏喏其威虺虺我淚既竭繼之以血百海
其深莫喻我心我生不辰伊誰之云無越我墻我垣我
藩無菜我田我田我廩天命有定我將我怨爾無人怨

我爾用歆乃塤乃箎乃瑟乃琴乃磬乃笙以樂其音以
樂其音實獲我心峩峩墮山山則有樗彼灌者淵淵則
有魚匪今獨然振古如茲我苟不樂不樂奚為

廣漢難辭

有序

難古禮也周人三時皆行之春冬之季難難陰氣也仲
秋之月難難陽氣也蓋二氣或佚厲將乘之為灾故難
以止焉其制命方相氏帥百隸索室區疫以逐之又磔
牲以禳四方之神漢襲周制而其儀加詳選中黃門子

弟百二十人為侏子赤幘皂制執戣方相黃金四目蒙
熊皮玄衣朱裳執戈揚盾十二獸有衣毛骨中黃門行
之冗從僕射將之以逐惡鬼於禁中夜漏上水朝臣會
侍中尚書御史謁者虎賁羽林郎將執事皆赤幘陞衛
乘輿御前殿黃門令奏曰侏子請脩逐疫於是中黃門
倡侏子和其辭凡八十言繼作方相與十二獸儼譟呼
徧前後省者三持炬火送疫出端門門外騎士以次傳
火棄雒水中自漢至今朝廷之難雖廢而民間猶有存

者先臘一日巷陌社隸飾鬼神貌御五色龍虎文衣巡門擊鼓而難之予惡其言鄙褻因疏古者用難之意復廣漢辭使習焉其辭曰

陽陰乘化左右而行日歷昴畢得積屍大陵其氣勃芒更涉虛危墳墓西司鬼官攸房厲附強陰而降于霽殃咨爾十二神宣其威良姦突劔亢拂胃食虎甲作食殛雄伯食彫騰簡食不祥攪諸食咎伯竒食夢祖明強梁共食磔死寄生委隨食觀錯斷食巨剗其腎腸窮竒騰

根同享於蠱母使害傷咨爾十二神鍛爾戎兵出輶四方吮厲之益以代酒漿解厲之肌以充糗糧絲厲之腴織以為衣裳斥除慝陰暢回明陽乾坤載清物楙民印惟爾神之功神或不夢上帝是明急急如律令

補雩壇祝舞歌辭

周官有司巫掌羣巫之政令若國大旱則帥巫而舞雩漢法夏不雨祀竈母舉土功更火浚井暴釜于壇杵白于術為四通之壇於邑南門外方七尺植赤繒七其神

蚩尤祭之赤雄雞七玄酒具清酒搏脯祝齋三日服赤衣拜跪陳祝辭以丙丁日為赤火龍一長七丈又為小龍六長三丈於南方皆南向壯者七人皆齋三日服赤衣而舞之司空曹大亦齋三日服赤衣而立之鑿社而通之間外之溝取五蝦蟇錯置社之中池方七尺深一尺酒脯祭齋衣亦陳祝如初取三歲雄雞豕猪燔之四通神宇令民闔里南門開里北門幸得雨報以豚一酒鹽黍財足以茅為席然周制久廢典午以降漢法亦不行

而祝辭尤闕歲丙申夏旱羣巫雩于山川之神予既書其事復系之以辭曰

於泰鴻冒下民動以化時屈伸燬朱鳥萬物甄亢則害
陽畢屯土膏耗蓊欲瘠田峻奔勢維礮壇四通優明神
神中臨勃如烟宅嘉錫燦若羅繭握薦豕炳臂蕭灌鬱
金菊芳蒸氣上延合溟濛洞五精貫八牒茫無外莽脩
脩門沆碭駕以姦俯下土無不釗

鬱行風羽輪翔玄黃變慘復爽衆婢集亢景章愛然存

索之亡燥陰明迴叢陽符翹襟逝弗忘崇明裡成穡功
憑紺筵嚴以印應上公與天通植赤繒驂紅龍左列缺
右豐隆流火降鉅若鴻鬼婦劉散為風灑靈注徧四封
函斯活穎茸茸衆維魚兆已從融祉暉毓宵氓甫田阜
物豫成風平平綽以行人專與鬼胎蠻耿曜振霈充盈
神心暢樂茫良四寓綏萬國洋洽大康慶昭膺

楊刺史廟迎享送神歌辭

有序

浦陽鷄冠山上有古神祠相傳祠漢交州刺史楊侯侯

縣人也名扶字聖儀累官皆有惠政侯歿已千載民以
雨暘禱輒應是侯之神在天猶不棄於吾民也吾民其
可忘於侯乎漁雖不敏為撰迎享送神之辭俾邦人歲
時歌以祀侯其辭曰

紛紛溶溶睨天門白蜺出雜雲敦翩我靈整修駕車登登
般裔裔翩我靈降潛場回飈興與之翔翩我靈變陽陰
奔以放光淫淫翩我靈續如唐神鬼衛鳥翼張

右紛紛溶溶一

神筵啓混朱黃愉以康悅芒芒奄靈車奠芳酌爵行千
流若雨奄靈車蕙為肴饗且飲以舞歌奄靈車靈已醉
廣宣延無不脩奄靈車樂無極神山高高可測

右神筵啟二

氛翼翼欲上升指青玄化為文靈之旋疾如風從西虎
導東龍神之旋髯長逝凌紫青瑤光下靈之旋兆逢惕
景已滅猶放蕙靈之旋錫我祐沛若雲雨下土

右氛翼翼三

題辭 凡二章

菊坡新卷題辭

當塗陶君用高蓋出於晉徵士元亮之裔凡宦轍所臨
必效前人種菊花滿坡當萬木搖落時花始秀拔低昂
枝上若赤金所鑄錢頗可玩用高公退之餘酌酒與花
對恍然如在柴桑籬落間殆忘其章綬之榮案牘之煩
也或者疑之曰仕者樂乎朝市故馳而弗息隱者慕於
山林故往而不返有若水之與火未易合也昔者元亮

遭時孔艱不能為五斗米折腰向鄉里小兒因有托於菊而逃焉耳今用高則不然生逢有道之朝亦既由憲史檢校中書而主畫於秋官矣衆咸以致君澤民期之用高則畱情於菊若將與世相違者無乃不可乎嗚呼是何言歟是何言歟觀人之道不于其迹而于其心迹固朝市也而心則不忘乎山林謂之吏而隱可也迹或滯乎山林之中而其心則豔華趨榮無一息之不思市朝苟謂之為隱孰能信之况君子之出處可仕則仕可

隱則隱初何容智力於其間哉設使元亮當今之時將不能不仕而用高生於元亮之世似亦不得不隱也世之人學元亮者多矣皆在乎去位之後用高則見於在官之時此蓋魯男子之善學柳下惠者也用高誠賢乎哉予固不敢以用高方之元亮也以其志之或同而他入未必能知也聊相與一言之并作采菊之辭以遺用高曰我采我菊露其和矣今我不樂鬢其皤矣鬢其皤矣吾行歌矣我菊我采露其晞止今我不樂白日馳止

白日馳止吾顏衰止歌罷用高攬衣而起曰贈予言者
盈三帙矣子頗能知予之志曷為書于新卷之端俾詩
家者流繼之他日約子於三徑間俯仰西風歌此辭而
餐落英顧不美歟予不敢固辭用高通儒術為人仁厚
士林中多稱之云

羅鄂州小集題辭

有倬羅公家于歙邦幼名曰愿冠子為端良其父吏部
內外踐敷春秋之學與胡氏抗衡生子凡六皆能辭章

公居其五尤赫赫有芒既收世科歷仕縣州出刺武昌
皂蓋朱旛績用翕以張夫自五季以來文氣日靡宋室
龍興篤生哲師汶陽浚其源二尹導之元城倡於前范
張和之逮于廬陵日粹以夷臨川南豐眉山父子同燄
而聯輝清寧協順功用發揮精氣充斥暢達蕤綏變化
合神而光景弗虧奈何王輒既南涉于偏頗衰俗羣趨
以事決科浮聲切響駢言儷辭襲謬而踵訛公挺其間
弗徇弗阿濯其孽痼障其頽波謂六經之作如日行天

不可以軋摩唯秦暨漢是則是效接其遐軌而視法在
軻然而畜之不弘則動之弗振涵志今古潛神典墳玩
陰陽之交察海嶽之文覈治亂之變通典禮之津以至
稗官虞初旁行敷落鳥獸蟲魚之倫凡可以資博識者
咸區別而彙分力思精索從莫達宸立功以凝將通乎
鬼神故其形諸篇翰鑰啓繭抽高雅精鍊莫之與述喬
嶽嶢然上凌太清而陋夫土丘戴冕執圭屹若山立而
異於卉裘棠溪之金美則為鏐干將之鐵百鍛始道視

彼蝕鎗腐鉛愛乎不侔考亭朱子取法魯騶發人瑕類
一髮必讐獨推公文而弗舍者以協理之微幽嗚呼公
既逝矣遺文四行唯於東南粲如列星遭時不平遂壞
於兵其諸孫宣明賢而有徵懼懸黎之鏹彩結綠之沈
英復鍤於梓以震其聲以開其冥以鉤於衆聽濂也不
敏幼誦公文蒼白無成搏朽壤以代礪不壓亦傾揉敗
靡以為弧莫使之綑其瞻公之製作猶應龍之降升區
區贅述何繫重輕姑序其作者之意於首簡使後生小

子知豪傑之士不為衰俗所囿而雅渾之作或當與秦
漢并

文憲集卷二十九

欽定四庫全書蒼要卷一萬六千六百九

集部

文憲集卷三十

明 宋濂 撰

贊 凡三十九章

文右相像贊

才優德純山峙玉溫重厚可以鎮俗仁恕足以澤民或
陳經術而侍青坊或秉霜簡而立紫宸終受知於聖主
宅右揆而相秦深沉有謀真潞國之裔剛毅忠信誠絳
侯之倫觀其屹立不動正笏垂紳猶可作懦夫之氣而

褫邪佞之冤嗚呼此所謂邦家之重寶廊廟之大臣也
歟

婁貞公贊

有序

原武婁宗仁當天后政嚴之時獨以寬厚聞其弟守代
州宗仁教以唾面自乾至今為善者師焉因贊之以自
勗贊曰

我言之忤斯辱之招我行弗足或貽其辱二者無失其
至由外內省不疚我則何罪我面彼唾乃彼之愆我何

潔之正使自乾孰忿自乘攘袂而闕孰量之弘受詬如
頌是非苟繆不亦殆而微公之師吾誰與歸

陸秀夫像贊

身抱龍髯兮眼不見水鳳闕雖遐兮龍堂則邇玉雪皦
如今肯汚泥滓赤日出海兮爾心不死

滕奉使贊

有序

齊人王蠋有言曰忠臣不事二君烈女不更二夫女之
從人一與之醢當終身不改譬之白璧小有玷辱人將

斥去而不之顧臣之事君也其理亦同故蠲特並言之
事兩夫者雖辨如虞姬智如鄧曼吾知其決非良婦事
二君者雖功如汾陽才如西平吾知其決非良臣嗚呼
使此義昭如白日人臣安肯懷二心而國安有喪亡之
禍哉東陽滕茂實當宋靖康初以太學正與僉書路允
迪奉使於金議割三鎮太原尋奉密詔據城不下金人
怒囚之雲中欽宗北遷茂實謁見涕泣請從行主者不
之許其後允迪南歸茂實獨留鴈門終身不再仕臨沒

令以黃幡裹屍而塋仍刻石識云宋使者東陽滕茂實墓此殆不事二君者歟當是時有宇文虛中者亦以黃門侍郎使金見留遂改節易行反面事虜其後雖欲奪兵仗南奔而自贖卒亦不逃君子之譏其視吾茂實果何如也茂實已矣人至今想其遺節如神龍不可得見至視虛中輩不啻若鬼蜮犬豕有識妾婦亦羞聞之此無他人心天理終不可誣也乃作滕奉使贊用規事君而有二心者贊曰

漢有蘇武奉使不屈滕公繼之有聲烈烈黃幡裹屍以
全臣節如壁之白弗緇弗缺其人雖亡其神不滅上游
帝所凌厲日月降臣見之肝碎膽裂敢述贊辭勒在貞
碣

東陽十孝子贊

并序

十孝子者皆東陽人也其事載於郡乘為詳予讀書之
暇因盡探其昊天罔極之思而為是贊以風世之為人
子者

秦顏烏鳥傷人

古有醇孝厥姓惟顏父喪未葬行泣道間我畚我鍤是
糴是瘞彼羣烏何知銜土予助我豕既封烏吻血流感
爾異類愧我同儔秦風日漓借擾鉏而德色誰意露雲
之四蒙見此皦日千載之下禮憲淪胥豈獨愧君烏亦
不如有廟嚴嚴春秋是祀用興薄夫作孝子

吳斯敦

東陽人

有孝者斯峴山之阿父罪當誅兒心奈何自非吾親盍

從生我我寧墮身父死其可九關我我虎豹斷斷泣血
上書願易以身王用爾恤卒全父命更旌爾門風彼不
令池波齋淪宰木扶踈清風肅然過者下車

晉許孜

東陽人

嗟嗟許生實孝于親胡風木不停遭此難屯輜車既載
負土築墳我親我璫敢曰勦彼鄉民手胼足胝我不為
辛巾笥猶存几筵不改惕然念之吾親何在秋霜凝凝
春雨濺濺父兮母兮得無苦寒與飢兒既不可見寧不

念茲天高可極此情罔極鹿獨不閔我觸我松栢嗟嗟
許生厲志不移終身之慕於子見之

唐馮子華

東陽人

緬彼孝馮結廬墓傍思親不見欲與俱亡白月寥寥悲
風四起蒲伏號呼哀徹心髓天錫嘉瑞慰我孝思有皦
斯兔有燠斯芝孝馮曰噫吾焉用汝九京莫興百瑞奚
補唯爾孝子樹我世防雖歷萬祀厥德彌章自公之亡
肖公者幾茫茫堪輿孰非人子

唐應先

東陽人

卓哉至行衆人所難眷我應君投涕汎瀾親之云亡中
心咽塞雖草生髮間何暇束櫛昔處膝下其樂泱泱今
我来思舉目但見白楊彼蒼者天曷不我惻苟可從之
我生奚恤爾心之苦爾行之優雙闕戕戕卒承天休

唐唐君佑

東陽人

唐氏之子以孝行聞死生一節弗岐弗分唯思親不置
鞠明究腫誰無父母以樂以愉今我何罪獨行次且我

罪之深我宜墮墜胡獨使我親先彼朝露昊天不弔直
至于斯渺渺音容如何勿思官用褒旌封闡在舍匪私
爾一人式勸來者

陳太竭浦江人

浦汭之間有氏曰陳親沒居廬衰麻終身心勦形瘵杖
而後起一氣如絲去死無幾朝哭如吞莫哭尤不忍聞
松風脩脩林鳥嘒嘒來助予之悲號遐思弗寧起奠我
爵果肴在前烏鳥為之不啄世猶失防顙波滉漾我思

古人古人焉往

宋董少舒

蘭溪人

有倬董君父以令終躬負厥土馬鬣其封四郊無人夜
寒如水黑飈潛興如臨神鬼董君出廬擁墳撫膺念父
寥寂長哀無聲日兮月兮能照下土寧不閔我最苦願
亟入九泉奉我父母靈芝煌煌駿發爾祥蓋紫幹黃於
燧其光有倬董君德聲斯不亡

宋金景文

蘭溪人

激水之州三山之坡下有孝子孝如之何父疾在首顙
天請代願萃予身我親罔害母棺未窆執纚以前天光
下燭五色粲然五色粲然未足為偉怪電獐風勿犯其
里苟匪中忱曷以臻此縣代是師於戲孝子

宋賈南金

金華人

孝道之弘百行所生誰與賈氏實敦古風生弗離親歿
安可棄忍令親之玉體為泉扃所閔晝雖不可見接以
夢寐夢中相見宛其未死覺後求之寒燈在几得不慨

茲潛潛墮淚睠爾孝德閱我章縫扼蠟其貌黼黻其躬
父子相軋或不相容我述贊辭用發民衷

許魯齋先生贊

濂洛之學傳自武夷重徽壘照日星昭垂逮我許公尊
聞行知若親摳衣寒泉之靡張皇幽眇釐析毫絲如皐
陶淑問畢其情辭如后羿注矢不失其馳既入閭域遂
升堂基橫經冑監衿佩鏘如祛其人私牖其天彝釋其
偏岐挽其九衢德成財達昭用如時黼黻帝治甄陶泰

熙明體適用公實庶幾無德弗報四海祝尸嗚呼許公
百世之師

劉靜修先生贊

先生之心嶽鎮川澄先生之操玉溫石貞先生之學寤
寐六經岐陽之鳳魯郊之麟和氣襲人盎然陽春發周
孔性情挹其深醇或出或潛與道周旋九原可作吾為
執鞭

吳草廬先生贊

紫氣蟬聯神物蜿蜒有開必先山川降神自元而貞篤
生哲人慎斯勤斯絕乎等夷於道早知厲如秋霜煦如
春陽何德之昌抱膝而居氣蓋八區闕而弗舒玩心神
明操觚弗停輿衛聖經學徒是依毛之有麟甲之有龜
其淵冲以消吝封心熙氣融大明當軒留聘益尊施教成
均北許南吳先後合符人文之敷大明太史金華宋濂贊
虞文靖公像贊

朱明之墟離火降精也丹鳥禪褫為駕綵輶也手握化

樞人文昭明也補帝袞衣五色熒熒也上凌霄漢下燭
九溟也無幽不啓無芳不榮也頓挫萬彙配合三靈也
獨騎元氣棲神窈冥也之死弗沒隨物流形也凝為商
雲燦為德星也琬琰所勒鬼秘神局也命世之材一代
之英也

先師內翰柳公真贊

偉貌長身端嚴若神即而就之煦然春溫海濶天高莫
窺覘其宏度霆奔飈豎實驅駕乎雄文來趨蹌之襟佩

作儀表於薦紳出入容臺振百年之禮樂昭宣帝制煥
大號於乾坤惟其具該博崇深之學所以繼光明俊偉
之倫仰瞻遺像有涕沾巾儻使泉臺之可作庶幾士俗
之還淳門弟子具官宋濂拜讚

吳山長像贊

有序

原道書院山長吳履予之異姓弟也人之評履者一則
曰履善屬文其嚴簡蘄絕處類秦漢間人語迫而視之
有光淵然也一則曰履自幼沉酣義獻中行草書皆入

妙品如寶劍舞空光芒疊發芙蓉出水態有餘妍當與
鮮于太常齊驅其得意者或謂過之其知履僅若此至
其尚風義赴友朋之急不顧水火雖古人猶難之者未
必能知履也因贊之以白履行于世贊曰

若人者其古君子之徒與聞人急難即欲赴之力縱不
及心懸懸其如飢水火在前幾若弗知輾轉不寐而長
夜以思世滔滔而莫察吾獨探其隱微彼以藝文為矜
衒者其相知也不亦淺而若人者其古君子之徒與

石巖凌先生像贊

冰霜顏面鍊石心腸持斧七閩百壬歛藏神明之政淵
源之學其人雖亡清風猶昨

溟滓生贊

有序

溟滓生者盱江廖應淮海學也抱負奇氣好研摩運世
推移及方技諸家學年三十游杭上疏言丁大全誤國
狀大全怒中以法配漢陽軍生荷校行歌出都門道傍
觀者嘖嘖壯之抵漢江濱遇蜀道士杜可大揖曰子非

廖應淮耶生愕然曰道士何自知之可大曰宇宙太虛
一塵爾人生其間為塵幾何是茫茫者尚了然心目間
矧吾子耶然自邵堯夫以先天學授王豫天悅天悅死
無所授同墓玉枕中未百年而吳曦叛盜發其冢得皇
極經世體要一篇內外觀象數十篇余賄盜得之今餘
五十年數當授子吾侯子亦久矣乃言于上官脫其籍
盡教以冢中書其弄絲聲音起生神鑒穎利可大指畫
未到者生已先意逆悟可大自以為不及學既成去隱

宣歙間遇余安裕弋陽將教之安裕勸生業中庸生瞠目厲聲曰俗儒幾辱吾康節於地下矣復去之杭客賀外史家書市大衍數夜沽酒痛飲即吐吐即飲不醉如泥弗休醉中嘗大呼曰天非宋天地非宋地奈何奈何語聞賈似道遣客叩之生曰毋多言浙水西地髮白時是其祥也似道未解復召至屏人與語生曰明公宜自愛不久宋鼎移矣似道惡其言掩耳走生亦徑出過魯淵子家索酒轟飲酒酣作嬰兒啼曰大厦將焚燕猶

呢喃未已耶復賦歌以見意都人士聞之競指以為恠
民不與接獨太學生熊希聖猶時造其廬生私執熊手
謂曰吾端居曾樓聞空中戎馬百萬來人鬼作哭泣聲
壬申襄樊陷甲戌宮車晏駕乙亥長江飛渡似道亦殛
死臨漳丙子三宮播遷諸王大臣皆南北亂走噓吸事
耳予不去欲何為居亡何宋事日非沿江州郡望風奔
潰生大慟曰殺氣又入閩廣中吾不知死所矣遂遁去
其言無一不驗後四年病死處州學中年五十二無子

唯一義女從之生宗堯夫先天之學頗自謂知易每見諸易師傳䟽不問淺深輒訕駁以為樂及論後天則尊義畫為經彖又繫辭為傳黜文言彖象二傳為九師之言且謂說卦非聖筆不能作上下繫乃門人所述序卦直漢儒記爾蓋生聰明絕人未聞道而驟語數故其論經多失中然性使酒難近又好訐人陰私人面頸發赤不顧罕有從其學者唯國子簿吳浚進士彭復樂師之浚不卒業復屢受唾斥不怨生將遁時召復至口發例

手布籌雖平昔所靳若終身不示人者一舉授復復後
又授鄱陽傳立云或曰生瀕死語女曰吾死後一月中
朝命山姓烏名使者來徵吾及傳立立當過予門汝可
出藏書示之立當以此致大官後皆如其言所謂山姓
烏名崔鵬飛也生所著書有玄玄集厯髓星野指南象
喻統會聲譜畫前妙用數十萬言今猶間傳于世贊曰
龍圖成章有文從衡以濬以明以洩其藏以奠乎玄黃
昔我素王帝編三絕墜緒微茫誰其我綴我叅我腴九

師襄之我苞我晶百氏攘之如河之渾如瞠而昏如治
絲以棼天未降割一髮攸存維洛有士居于百原超神
冲漠凝於畫先數往知來小大斯甄莫峻匪厓我陟其
顛莫深匪淵我淪其泉簡材以畀非隱弗傳有冥者冢
卒昭以宣或得其牖載神于言炎炎宋錄維其訖矣長
星蝕柳色之赤矣青祥見徵上髮飢矣朋昏以世莫之
戚矣魚在在鰲尚其息矣維生之知中如沸羹彼昏弗
知覆謂我狂我狂如何我憂孔多我山我河我用弗磨

俾淪胥以訛我酒既嘉我瑟又鼇我寧不嘯歌北風其
涼旂旐央央我車龐龐蕩蕩江流杭之如陸有腥其穢
流血沃沃海氛方殷其何能目人有恒言風雨漂搖夏
宇障之涉于大川烝徒楫之楫副宇橈子子焉依國武
斯墜不知攸戒日隕弗升雖晝作夜鵲舞於林鬼瞰于
舍孰投是艱魯莫之艾乃怒乃驚乃瞻乃行乃遯死于
冥賸生之為胡乃神以著徵之古聖匪程伊度何以言
之卒淪于數一曲之淹不通其故易道既泯數亦不類

激贊於生發我長喟月出皎兮在天之心在天之心何
古何今

余自幼即見長老談溟津生事近見李淦性學及戚
光子實所造文又知生為詳以生之精藝如此而修
宋史者不列之方技傳中殊可恨也故予愍之特序
之又傷易道之微激而贊之惜乎予文蕪陋不能永
生也然予情亦至矣漁志

采苓子贊

有序

滎陽鄭仲德有隱操嘗采苓九藍山間因自號采苓子
斯贊之所由作也贊曰

彼采苓者肥遯之士皦皦霞外不容纖滓白月入懷涼
颼泝檣高視一世何慮何營

匡山居士真贊

紫眼有稜足以洞視千古長髯如戟足以畏龍言百壬或
建大將鼓旗而殄殲於妖沴或被處士冠服而容與於
雲林可顯可晦載浮載沉壹委順於外物初無累於貞

襟縣千尋之丹崖莫踰其峻瀦萬仞之重淵罔測其深
抱忠義之志而耿耿自信所謂不變不改若百鍊之精
金者邪

曾侍郎像贊

身形之瘦弱也則山澤之臞精神之凌厲也則列仙之
儒博極諸書而守之則約智周羣類而處之若愚當議
禮而考文較損益於錙銖稽百王之軌典翼一代之鴻
圖豈非養德之腴造道之樞而為國之耆父邦之著龜

者乎

章判官像贊

有序

唐福州軍事判官章公修實檢校太傅仔鈞之父也其遺像至今蓋四百餘年矣二十世孫御史中丞溢偶於閩中購得之如獲至寶持以示其友宋濂因為作贊贊曰

器局深沉容儀嚴肅吁嗟哲人如金如玉餘慶所被孫子若雲重珪疊組至今揚芬

四十二代天師張公像贊

含冲葆虛執真之樞翊度宣靈契道之符龍虎衛乎左
右風霆屬於指呼此古之博大真人而今之列仙之儒
者邪

趙使君像贊

宋之王孫元之循吏才優識明政通民治未老而歸臨
難不貳懦夫觀之可以作氣

趙子昂像贊

文運中微頽波日靡公起東南作天一柱天人之表帝
王之孫麟游鳳翔珠明璧溫歷試中外遂居禁密其名
之升與日同出彼儉邪者腐鼠敗豚何能病公臭穢自
聞三百年間西東萬里雄鳴一代如公者幾公貌如玉
公文如金變化莫測照耀古今

李太白像贊

有序

元行臺治書侍御史亦憐真班所藏李太白像係秘閣
傳本吾友危君太僕嘗為之贊自後流落於金陵駱氏

酒家洪武己酉秋郡士王宗溥購獲之尋以募本見貺
因造贊曰

長庚降精下為列僊陵厲日月呼喻風烟錦衣玉顏揮
毫帝前氣吞閭豎視若烏鳶頓挫萬象隨機回旋金童
來迎絳節翠壇下土穢濁孰堪後先蹶然一笑騎鯨上
天

傅同虛像贊

將求子於外兮則鍊精於三田欲索君於內兮則游神

乎八天是皆窺見夫粗迹而未能暢達其真玄高岑兮
谷綿白鶴舞兮蹁躑豈非長跨於洞庭之野吹瓊管而
招飛僊者耶

宜春夏都事遺像贊

以忠字尚之

其才孔良其氣則剛沉潛乎仁義之府孺嚙乎禮樂之
場窮春秋而寓衮斧法菽粟以為辭章使之專城而居
則可以攀次公之黃使之入直鑾坡則可追文成之張
胡為乎低回下列莫展一長託使車以遐覽竟仙游於

五羊豈詘於人者難知而信於天者不亡後千百年剛風鬱滂當見騎麒麟而下大荒者耶

玄英處士方公遺像贊

有序

予學子方孝孺玄英處士之諸孫也持處士像來請贊贊曰

振騷雅於江南混漁樵於玉笥諫垣天近雖屢形州牧之童牛衣夜寒終不奪煙霞之志凜然亢直之風可折諂諛之氣遵真曜之遺則造玄英之私謚唯其畜厚而

發弘所以繼隆而傳熾紳笏蟬聯勲庸赫著蔓延閩浙
之間莫匪雲原之裔敢申贊辭式昭瞻企

王宗普像贊

以子為貴介公子耶何其神清氣和無綺紈之態也以
子為仙翁釋氏耶何其與時俯仰遊乎方之內也以子
為詩人韻士耶何其清竒勁直訥然而謙退也然則果
何為者耶蓋跡混乎三者之中而心游乎埃壘之外此
吾嘗謂空同子以古之人而處乎今之世也

危雲林像贊

文繼虞歐之盛位居廊廟之尊天下譽之而不為喜衆人毀之而若無聞此公所以為大雅之君子傳百世而長存者乎

王指揮像贊

真人龍興山川降精杖劍來從莫非豪英維時王公實將家子虎吼鷹揚萬夫披靡成功錫爵遂鎮一方弛其武威佩玉冠裳何以觀之有燧其像益懋厥勛配古良

將

蘇都事伯夔像贊

子由後平仲父

才足以行志智足以成事也苟盡施於時必有大過於人而得位以行者僅出其一二也年齒之高林泉之趣皆公之所宜有固天報善人之所致也惟有子之甚賢以文鳴于治世足以繼絕學于前人揚休聞于不墜也此吾嘗私為之善誦長公之言擬公於晁氏之君成而知其無愧也

自題畫像贊

有序

廣陵孫生貌予真人皆失笑謂無不似者因題其左辭
曰

似柔而強如愚而明辨駁百氏寤寐羣經千載之長一
世之短前武儼然吾敢不踐

又

吾心與天地同大吾性與聖賢同貴奈之何隨於曲學
局乎文藝忘其真實之歸溺此浮華之麗顛躋於得喪

之塗蒞惑於是非之際縱濫廁於大方曾不離夫小智
靜言思之幾欲霽涕奮自今以為始日載惕而再厲有
如升嶽者當極於崇顛辟若改火者須資夫新燧期融
通於高朗誓媾治其蕪穢用致知為進學之方藉持敬
為涵養之地續墜緒之茫茫昭遺經之晰晰雖任重道
遠必篤行而深詣庶幾七尺之軀不負兩間之愧爾其
勉旃以終厥志

越國夫人練氏像贊

有序

天地之大德曰生夫生者乃天地之心雖陰陽之所運
行有開闔慘舒之不齊然天地之心生生而弗息者恒
循環於無窮有如碩果不食則其生道已具其中俟時
發榮挺然而莫之遏矣時至五代用兵爭強屠戮逮乎
鷄犬是天下極亂之時蓋無復人道有能於其間不為
氣運之所變遷而一念之仁有以契夫生生不息之心
則其感召之速所以敷遺於後人者其澤曷有既哉閩
之練夫人諱寓建州刺史章公仔鈞之妻也生而肉髮

深沉而端毅終日或不一笑言且知識有絕人者時閩王命公屯兵浦城之西巖南唐盧將軍帥師來侵我公遣二校請師于州失期將斬之夫人勸曰時危民未靖公奈何斬壯士公悟不問二校逸入南唐皆為大將一則金陵邊鎬一則上元王建封也保大三年二月南唐遣江西撫安使查文徵伐閩取建州鎬為行軍招討建封為先鋒橋道使奪其險要已而建封焚外郭八月甲子克之公歿已久獨夫人猶存二校遣使者持金帛遺

夫人并以一白旗授之曰吾且屠城夫人宜植旗于門
吾已戒士卒勿犯矣夫人反其金帛并旗弗受曰君幸
思舊德願全此城必欲屠之吾家與衆俱死耳不能獨
生也二校感其言遂止夫人之子一十五人孫六十八
人多躋顯仕而其後人繩繩相繼位宰執登法從歷卿
監佩守令之章者殆百餘人嗚呼何其盛哉非夫人有
以契夫天地生生不息之心則其施報之厚未必若此
之至也原夫人之心渾廓昭融不限封域視一城之生

聚不翅如一家真有所謂仁者之量歟慶以類大易之
旨也夫人之後其有不蕃昌者乎其有不絢著者乎昧
者不知天之未定謂為善無足倚是則天之生生之道
絕矣夫奚可哉夫人二十世孫存道以遺像求予贊予
既質諸傳記以序夫人之事而復為之贊曰

懿彼夫人生于七閩肉髮有倫靜毅而莊動循厥常女
士之良笄而有歸建州之妻其德與齊建州桓桓旗旒
緇緇以扼事關將固我城必集我兵移書以徵二校言

旋何期之愆絕首以懸夫人曰吁乾坤創夷壯士勿誅
逸之使奔遂為唐臣建旆而軍爭城以攻火旗畫紅陷
其四封二校有云使鬼為人夫人之仁曷其報之曷索
我私曷授我旗旗植于家有突而譁我劍之加夫人曰
吁是城卒屠我生何為有衆若林昔而斧礮今而謳吟
夫人之亡其迫已蔽其澤愈滂傳紫襲龜霧滃雲迷被
于今茲遺像儼然萬目斯瞻曷取則焉矣

黃氏三壽圖贊

浦陽合溪人

資善

身安而家裕者人之所欲也藏智不用而厚重有餘者
天之所福也君有以_其乎天故不求而自足也超乎寵
辱離乎毀譽而游乎物表此人之所難能而君之所獨
也

資深

智足以燭理而加之好學敏足以蒞事而本於無私事
長不以和樂勝禮馭下不以慈惠傷威行乎家庭春溫

而秋肅著乎言行方矩而圓規斯學者之所難能苟謂之篤行君子其孰以為非耶

資文

人知其外之偉而不知其內之美知其才之豐而不知行之崇是蓋質而不二和而有禮介而能通者也

龍馬贊

有序

西南夷自昔出良馬而產於羅鬼國者尤良或云羅鬼疑即古之鬼方其地有養龍院在兩山之中泓渟齋深

開闔靈氣而蛟龍實藏其下當春日始和物情酣鬯夷人立柳阮畔擇牝馬之貞者繫之已而雲霧晦冥咫尺不能辨色類有物蜿蜒上與馬接蓋龍云連天色開霽視馬傍之沙有龍跡者則與龍遇乃謹其芻蕘而節宣之暨產必獲龍駒焉粵若洪武四年六月壬寅夏國主明昇以全蜀降獻良馬凡十而其一色正白乃得之於阮者身長十有一尺首高九尺足之高比首而殺其二尺有肉隱起項下約厚五分廣三寸餘貫膺絡腹至尾

問而止精彩明晃振鬣一鳴萬馬為之辟易韉勒不可
近近輒作人立而吼上謂天既生此英物必有神以司
之親撰祝策詔有司以牲牢祀于馬祖然後敕典牧副
使臣高敬囊沙四百斤壓之人跨囊上使其游行苑中
久之性漸柔馴適八月癸巳上將行夕月之禮於清涼
山壇上於是乘之而出如躡雲而馳一塵弗驚皇情悅
豫賜其名為飛越峯復命御用監直長臣馬晉臣繪其
真形藏焉臣濂稽諸載籍漢之元鼎中有神馬出渥洼

水中馬之生於水者尚矣養龍之說雖相傳於夷人要當可徵不誣也肆惟皇上以大德而位大寶日之所出日之所沒無不梯山航海獻贄奉琛邇者獨角之犀來自九真食火之鷄貢於三佛齊之境其他侏形僞狀藉藉紛紛且不一而足而况茲水產之龍馬乎周書有云不寶遠物則遠人格所寶惟賢則邇人安皇上宵衣旰食日懷保於小民巖穴之士蒐羅殆盡將圖治安如黃虞時其遐荒殊裔珎毓奇產未嘗有心求之所以榮光

休氣洋溢中國仁聲義聞充洽八表而龍媒之異自致
於天閑十二之中揆之於書前聖後聖盖同一軌轍也
其視貳師之遺黷武窮兵以索諸大宛者果為何如哉
臣濂以文字為職業際茲盛美不敢默而無言謹述贊
辭一首以貽諸後世贊曰

天駟熒蛟龍升靈泓澄神馬生祥飈瑞靄晝杳冥天一翕
聚通精靈龍胡盈鳧臆輕竹披耳鏡懸睛花雪捲毛光
照夜汗溝有血霞流頰振鬣鳴萬馬驚閃流電逐飛星

九霄彷彿從龍行但聞瀟瀟風雨聲三川平八極寧真
龍媒獻龍廷出入天門駕龍駟雲霞五彩蒲瑤京皇風
清皇道貞皇威明茫茫堪輿內孰敢不來庭陋彼漢將
軍空圍貳師城乃知天子在樹德不必連年徒用兵

墨鞠圖贊

有序

建安蘇照為學子黃叔陽作墨鞠圖侑之以竹石豈以
其氣節之相同歟禁林散吏宋濂為造贊曰

我本中黃鍊為肺腸精神外章不自知形貌之黝歟綠

竹猗猗白石瑳瑳貞而匪阿斯為月下之友歟萬色齊
冥洞容物情雖暗而明豈陶令沉昏而托之酒歟

陳方都督像贊

桓桓俊英矯矯虎臣心雄萬夫才佚三軍爵列崇階功
在盟府圖像雲臺流芳千古

李徵君像贊

嗜義親賢以道自娛懿哉若人君子之儒

虎林處士贊

有序

虎林處士王君年踰七十而視聽如少壯時其孫監察御史驥從予受經者久間來請贊贊曰

素髮垂垂中心熙熙儉勤作肥家之本嚴厲為馭衆之基好施之仁久而彌篤嫉惡之氣老而不衰吹鳳簫於明月之夜飛羽觴於百花之時大布寬衣容與委蛇不知者謬稱虎林處士知之者以為瓊臺之神仙乎

華嚴經贊有序

上人幻滅嚴持梵行欲求無上真如之道嘗自念言華

嚴大經實中天調御第一時所說一乘頓教化為尊勝
欲熟松為煤入以香藥搗和成劑以書此經而彼松煤
者假物所就具黑暗相有染白法欲煨汞為丹承以空
露研潤如法以書此經而彼汞丹者炫耀可觀能育人
自非造道者欲推赤金素銀廉薄如紙復粉為泥以書
此經而彼金若銀雖曰重寶外塵為體初不自內以是
思惟身外諸物若勝若劣若非勝非劣若一若多若非
一非多皆不足以稱此殊利繼我一身內而心膂肺肝

外而毛髮膚爪資血以生資血以成資血以長資血以
至壯老暨死是則諸血衆生甚愛如梵摩尼一滴之微
莫肯捨者我今誓發弘願於世尊前以所難捨而作佛
事從十指端刺出鮮丹盛於清淨器中養以溫火澄去
白液取其真純蘸以霜毫志心繕寫滿八十卷尊閣益
壽禪居昔者樂法比丘當無物時欲聞佛語了不能得
乃信婆羅門言以皮為紙以骨為華以血為墨願書一
偈況今百千妙頌十萬正文不止于一縱捐軀命以報

佛思無足為異於血何吝唯願法界有情或見或聞證
入雜華藏海證入雜華藏海已即得六根清淨得六根
清淨已即得自性清淨得自性清淨已即得四天下微
塵剎土中一切衆生皆悉清淨無相居士未出母胎母
夢異僧手寫是經來謂母曰吾乃求明延壽宜假一室
以終此卷母夢覺已居士即生今逢勝因頓憶前事於
是親炳五分妙香香雲輪囷結為寶網徧覆經上乃復
合爪向佛散華作禮而稱贊曰

雜華淨智海九會之所說一音所演唱十處放光明信
解行證門總攝無復餘如是具五周如是辨六相如是
分十玄妙義皆充足以至四法界二十重華藏無邊香
水海教條有差別性相了無礙圓融與行布非異亦非
同一可為無量無量亦為一重重無有盡是為功德聚
如來最上乘龍宮所秘藏上人出身血嚴飭書此經於
一滴中中普含十方界於一一界中普現光明臺於一
一臺中普成獅子座於一一座中普見分身佛如上無

數佛皆具大威德眉間白毫光徧滿一切處共宣大乘
法聞者應解脫譬如日月生照三千大千悉見種種色
法能破暗故譬如大洋海平乃如掌無丘陵堆阜法能
平等故譬如陽春至大地盡發生諸根各萌芽法能霑
溉故譬如梵志夢一夢千劫事不過剎那間法能融攝
故譬如子憶母未見心已至形神皆兩忘法能無離故
譬如黃金色金色不相分金亡即色空法能不二故譬
如石性堅初不從外得石性自圓滿法無修證故能如

斯見解見經不見血若加精進力見佛不見經及至成
道已見性不見佛我性如虛空了無能見者無見中有
見全體即呈露苟執於所見亦非我本性見見二俱泯
此為真見見真見復何有性本無物收一心歸命禮祇
夜以為贊諸妙樓閣門彈指一時啓

大還龍虎丹贊

有序

龍虎丹贊為予友鄭源氏作源因讀金碧古文龍虎上
經有悟大還之旨用之修練節節有奇驗復以其玄秘

也請予白之作是贊贊凡四章

苞乾靈一

人身苞精氣妙與元化并一神管攝之鉛汞各流行神
所棲止處實為天地中闔闔類兩扉循環不竭窮廓然
含冲虛獨立不以形是即真息根强名帝乙庭靜極必
自顯内境垂白芒或想為連環無乃喪其常

斡花紐二

凝神入紫虛冲然抱一居青龍鬱上升白虎為熬樞牝

牡既相從蒸潤如流酥鄴鄂一以固溫養成子珠銷質
離中陰坎陽復來隨純剛號為乾潛躍契道符鬱羅蕭
臺中服霞漱雲腴閱歷無窮年永共溟津俱

考火記三

鼎爐乾坤樞匡郭水火魂戊己居土官一氣中夜存火
候十二時暮蒙復朝屯專氣而致柔綿綿日相因刑德
務並進文武須錯陳薰蒸洽太和天機益神津三元與
五氣一一返其根後天不能彫長為萬象尊

稽曲徵四

三千六百門盡墮魑魍場雌雄鑄為劍日月吸光晶尾
閤閉玄液九鼎運女英三遜及五假八石巧煎烹如此
之舉措難可一二名陰魔奪人命遺屍莽縱橫寒颯動
羅鄩時有鬼嘯聲方知涉有為不可學長生

觀音石贊

有序

虎林翁君祥卿得圓石一大可五六寸上現圓通大士
妙嚴寶相坐寶蓮華善財童子合爪侍側蓋大士住不

可思議解脫門能以神變作諸佛事攝受衆生大則示
化真身於陀怛洛迦山小則寄影像於一木一石不假
人為自然天造無非自慈愍中發現祥卿因請濂作贊
以顯神功以示闡提生我慢者贊曰


玄黃既肇分白石即受質斯時未有佛云何能應現千
劫皆佛化難以時節拘劫初與劫終常居寂光土石本
無情物其頑無與等初無感通者云何佛示像微塵刹
土中塵塵皆是佛有情與無情本來同一體諸佛亦無

數動曰那由他云何圓通佛獨此示神變圓通於支那
夙有大因緣所以不會捨如母之憶子如來談諸相皆
是虛妄集云何自着相曷以釋迷網田相以悟性正如
指指月見月指則忘寧有繫執故以此四者觀唯知佛
願弘聖凡盡融攝調御菩提心假石顯云異超出思慮
表既非圖繪力又匪鐫勒功幻成妙嚴相七寶作瓔珞
瞑目結跏坐正以慈愍故用警闡提者徒爾增我慢當
知神通力乃復有斯事始悔未見時口出不淨語如仰

首唾天唾還着面故愚凝誠可念寧忍加斥遂我願大
地人無不知三依見石非見石見佛亦非佛但見無量
光各自心中發徧照十方界明如日月燈十方諸品類
盡得諸佛智



文憲集卷三十



總校官庶吉士臣侍朝

校對官助教臣金學詩

膳錄監生臣馮堪